



安徽通志

ル 5  
1575  
61





1575  
61

重修安徽通志卷一百八十一

人物志

官績四

安慶府

張若震字宗岳桐城人廷璐子以舉人知天台縣歷官湖北巡撫乾隆壬申時任陝西布政值歲大歉詳請奏賑大府不可遂徑檄州縣開倉發給自行陳奏大府以擅動倉穀題參旋奉旨嚴飭大府竟允其請通省全活者不可勝計升湖北巡撫吏畏民安其人告諸疏如請廣收粟麥以實倉儲清查弁丁以杜詭冒運川銅以供楚鑄撥楚米以濟浙災皆於國計民生有裨卒於官蒙

賜葬祭所著有奏議雜文及靜春齋集

桐城縣志

重修安徽通志

卷一百八十一

人物志

官績

安慶府



重刊安慶通志 卷一百一十八  
姚鈴字卿如桐城人知貴州湄潭縣縣治多山少水艱於漑田  
鈴教以竹製水車穿山架壑源流數十里民甚便之歷升戶部  
郎中出知紹興府督治隄工寒暑無閒捕盜緝奸豪強斂跡調  
處州卒於任

桐城縣志

姚淮字思尹桐城人雍正初選授雲南河西知縣邑舊有街稅  
首革之立石示禁民間額稅不知科則不給印票乃刊給易知  
單然後民知定額邑東南北食琅井鹽獨西路食黑井鹽路遠  
而價昂或通融買食則指為私鹽為力請大府改鹽法又罷礦  
廠牛運之役焚窮民借穀之券掘土目假冢之佔民墳流不法  
淫僧以除民害擢雅州知州請減稅課革差徭打箭爐土司死  
妻無子而妾有子妻欲立其弟與妾爭印將搆兵急馳往宣諭  
立妾子而還遷重慶府同知西陽邑梅兩土司民爭界誣邑梅

民十七人謀叛十餘年不決瘐死七人為察其枉雪而釋之苗  
人感服累擢至嘉湖道卒

桐城縣志

左興字性成桐城人以保薦歷知廣東潮陽南海諸縣擢南澳  
同知權惠潮道知瓊州府事惠潮有巨盜陳班峯出沒海上為  
二州患上憲以為憂興伺其登陸分眾兜剿而自率百人趨海  
隅焚其舟賊無所歸盡就擒瓊州孤懸海外黎母之民率多不  
靖興陰撫熟黎使為偵探生黎有不法者輒擒治如律諸黎咸  
驚怖不敢竊出為害

桐城縣志

姚孔鉉字道冲桐城人雍正丁未以薦擢知縣發廣東初署恩  
平風聞匪民將劫庫為亂密修備具探知賊蹤親率壯士馳至  
土瓜節

桐城縣志

作萌

擒其渠李梅等十數人誅之及省中發兵至事

已定矣調番禺有某官所任耳目吏私有所干立杖之遷保昌



護南雄府篆禱於神而毒草自萎螟螣自消擢知韶州府請免  
惠韶開採銅礦二郡便之後知贛州修郡城及學宮書院郡米  
驟貴贛令出示減價市幾閉糶急諭重其價以招客米船銜尾  
而至數日價平前後累決疑獄活人於垂死者不可勝紀桐城縣志  
姚興滇字南召桐城人初官滎陽丞以薦知山西太平縣濬治  
史村舊河漑田無算調臨汾攝洪洞西藏用兵往來絡繹親巡  
慰諭民用不擾擢隰州升知山東武定府創建書院振興文教  
濱州有王四夏天增者殺人抵死疑其誣為之請釋上官不許  
密訪真凶獲之冤乃雪又捕獲陽信巨盜合郡宴然調曹州疏  
河以免水患賑災以活饑民兼擒巨盜姚黑餘黨悉散後坐所  
屬審案遲延謫戍軍臺人皆惜之桐城縣志  
方求義字綺亭桐城拔貢知龍南縣攝安遠歲饑請糶藩司不

許愀然曰藏穀備災災而不糶焉用穀為空其倉以賑民撫軍  
嘉之檄他邑為例移上猶尋乞歸桐城縣志

張若淮字樹穀桐城人雍正庚戌進士授兵部主事歷郎中擢  
御史建白皆為時所便累擢至刑部侍郎晉左都御史持風憲  
甚嚴時有憚之者欲以事中之終不得毫髮私以疾歸嘗充鄉  
試同考官督山東學政總裁四庫全書雖貴而衣履如諸生卒  
年八十五桐城縣志

方浩字孟亭桐城人雍正庚戌進士知祁縣移隰州時民惑於  
大乘教茹齋者數百人浩悉召至庭餉以酒肉有不食者強之  
後邪教牽連數省隰民得不染累擢至贛南道贛有奸民為盜  
者設法購捕不逾月俱獲旋以公誤降官事白而卒桐城縣志

胡承澤字廷簡桐城人雍正庚戌進士授刑部主事出為靈石



知縣治獄多平反興利除弊知無不為士民頌之桐城縣志

金大光字龍臣望江歲貢司訓霍山捐俸修葺學宮俎豆禮器

煥然一新卒於官著有閣亭閒草霍山吟望江縣志

范正笏字廷獻潛山拔貢官巢縣教諭修學宮建諸祠備祭器

輯巢志巢人立碑紀之歲饑勸糶穀價以平潛山縣志

李維璽字篆師太湖歲貢官當塗訓導捐俸修學建大成坊奉

檄辦賑災黎均得實惠調和州學以年老歸著有姑孰吟等稿

太湖縣志

陳宗韶字虞九太湖歲貢官虹縣訓導歲歉奉檄散賑方大雪

惻然曰吾不忍飢民冒雪來也遂徧歷各鄉往賑之竟以是得

寒疾卒虹人傷之太湖縣志

方觀承字遐穀桐城人雍正十一年由監生隨平郡王赴北路

軍營掌書記十三年還京加中書銜乾隆元年補內閣中書直  
軍機處七年歷郎中出為直隸清河道歷藩臬二司十三年擢  
浙江巡撫明年晉直隸總督兼管河務尋加太子太保三十三年  
卒於官

賜祭葬諡恪敏觀承學問淹貫通達事體恪勤奉職在山東稽查漕弊

嚴緝盜匪疏免安山南旺二湖升科在浙江開墾大壘漲地三  
十五萬四千八百餘畝歲增雜糧十萬石並奏禁婦女普陀進  
香及豆麥雜糧私運出海在直隸尤留心水利濬治永定滹沱  
白溝等河搜考奇材雜距等泉原委改移永定河之下口又條  
舉木棉事十六則繪圖列說以進

御題詩十六章並

命將觀承所作詩書於每幅之末四十二年題准入祀直隸名宦祠五



十一年奉

旨入祀賢良祠

一統志  
桐城縣志

馬占鼇字載陽桐城人考授州同歷兗州泉河通判泗水尹家  
城東嶺舊有浸泉流甚細泉夫屢妄報胥吏朋比為民害占鼇  
行縣勘實不能達河濟運為通牒院道檄縣永禁泗人德焉立  
石以紀其事後補中城兵馬司指揮有流毒富商而縊於其門  
者立往驗而白之

桐城縣志

馬鵬飛字樂山桐城人考授州同歷知南匯靖江崇明宿遷諸  
縣其在靖江以邑中水利惟團河港是賴而一切支流半成陸  
地乃循行港道捐俸開濬居民賴之初至宿遷積案千餘期年  
而訟清事簡大府奏江南治行第一歷開封同知升歸德知府  
皆有政聲

桐城縣志

馬澤字根香桐城舉人知陽信縣勸農桑均徭役調繁長清訟  
清政理以事解組士庶傾城追送贈遺一無所受

桐城縣志

潘恂字蘭谷桐城人乾隆壬戌進士知震澤縣歲饑不待申請  
開倉以賑民賴全活歷知江陰上海陽湖所去莫不遮道攀轅  
赴大憲乞留者在陽湖時承辦江陰匪徒徐晉臣偽造海票之  
案首惡抵法餘多省釋升常州知府開孟瀆德勝二河漑田數  
萬畝為設立小河閘因時濬洩至今賴之歷擢杭嘉湖道三權  
臬篆獄多平反以勞卒官

桐城縣志

熊會琮字公玉潛山人初署上海典史縣有奸民聚眾號攔江  
網縣令捕之毀輿歸巡道將會遊擊以兵進剿會琮請無用眾  
獨往縛之至則賊大譁露刃見僅一官一役乃稍定會琮曉以  
利害許以不死為首者十餘人墮入城先伏健卒於門縛之其



黨千餘人星散補崇明丞辦賑有異績巡撫邵基遺疏薦之蒙

召見知縣以下得

召見者自會珍始旋補寶應知縣築尹公隄寶應民俗婦不得於姑者

輒縊母家聚鬩沴氣乘之縊者遂多日數報毅然曰是可止也

遂往陳婦屍數以不孝之罪而鞭之其風遂止屢擢至徐州知

府

望江縣志

楊超恆字自芬懷甯人汝穀孫也乾隆丁巳進士知藁城縣吏

輕其年少串供頂凶以出人罪升堂數語立摘其罅漏卽置吏

於法一邑驚爲神明以艱歸起補觀城知縣又以艱歸起補增

城知縣屢決疑獄邑無冤民三縣人至今尸祝之

懷甯縣志

楊嵩年字申侶懷甯歲貢父一元嘗以歲貢官嘉定訓導有盛

德屢捐金完人夫婦嵩年官武進訓導歲饑分賑戶口必親歷

散給吏胥不能欺又爲縣分催積逋委曲勸諭民用不擾去之

日士民送者塞途

懷甯縣志

龍廷棟字宇一望江人考授州同知累官至廣州府知府誅鋤

奸吏清釐積案修整養濟院育嬰堂府屬納米向多折色民苦

重值廷棟禁而革之合郡德焉卒於官廣州人思之不置

望江縣志

宋光恩望江歲貢官靈璧訓導邑有水災奉檄分賑同委者四

人其三皆以侵蝕見黜惟光恩以公愼廉介爲當事所重後署

教諭致仕歸士庶送者塞途不絕所著有虹州集

望江縣志

張廷琛桐城人文端英子也乾隆初知茶陵州下車祇攜一僕

茹蔬飲水友事端人興利革弊雷厲風行訟無巨細投牒時往

復駁難不直者遽斥之稍直者刻期聽斷無不得情居一年囹

圜幾空暇則構學舍集諸生課藝指授如師弟以升任去州人



士卽講堂祀之

湖南通志

姚孔鐸字天木桐城人官崇仁縣丞署縣事值歲大荒孔鐸辦

理賑務竭盡心力捐廉不足復以家資助之全活甚眾

桐城縣志

方世雋字竹溪桐城人乾隆己未進士由戶部主事擢御史錚

錚有聲歷鴻臚太僕寺卿出為陝西布政使治陝六年升貴州

巡撫移湖南為政專務大體不事煩苛三省吏民咸懷其德

桐城縣志

縣志

張若本字根實桐城人乾隆壬戌以明通榜授丹徒教諭升新

城知縣履任卽改錦秋湖為稻田捐建義學修理河防調曲阜

曲阜向係世襲初改流官更新之際頗難合宜若本鄉建義學

社建義倉各十六所四氏考棚久頽力為修理委辦伊家河工

恩威並用士民帖然升漢陽府同知稽查匪徒謹備火患漢鎮

大治卒於官

桐城縣志

方輔悟字惺民桐城人知臺灣鳳山縣會黃皎作亂鎮兵往剿

糧餉倉卒無措輔悟亟發庫藏軍需無缺或以未經申請為慮

答曰隔越重洋待報必誤雖獲咎不能顧也及事平果以擅動

帑金褫職鳳山士民奔省籲畱大吏以聞奉

旨以知縣需次江蘇補儀徵調上元卒於官

桐城縣志

許曾裕字崙高桐城人官松江府通判地濱海葑田鹵港多淤

塞民間向有公項巨萬為挑濬費多為吏胥漁奪沿海設有烏

船出哨監修者多徇吏報修船出海輒壞曾裕俱身自督役河

濬港尾修廣深曲皆有尺寸海船完固積弊悉除民為立石以

紀其績

桐城縣志

許邁字嘯斗桐城舉人官高郵州學政勤於造士嘗奉檄委勘

重修安慶通志 卷之六 人物志 宦績 安慶府



水災以不忍之心矢公勤之略著有勘災絕句二十首纏綿愷  
惻聞者動心卒於官士民皆痛惜之

桐城縣志

張若翼字肅中桐城廩貢知廣昌縣舊有疑獄逮繫多人若翼  
到任立為判決自是案無畱牘勢家請託不行旋以治行內升  
刑部主事贊理平反歷官內外勤惠如一以疾告歸

桐城縣志

張若矩字開中桐城人官泲河通判屬吏侵帑行賄直揭其事  
忤上官意落職久之得白起補桂林通判引見

上嘉其前事特擢永安知府抵任值苗民蠢動將用兵若矩請身往諭  
之遂單騎入瘴鄉開誠曉諭苗民感泣事遂定黔中軍興轉輸

糧餉輓運數千里毫無遲誤以勞卒官

桐城縣志

葉中字登明桐城舉人知隆德縣調平番升河州知州平河兩  
地番回雜處民貧俗悍盜賊橫行中嚴加告誡治以重法四境

肅然卒於官兩地皆祠祀之

桐城縣志

姚肇修字蓬觀桐城舉人知光山縣邑蝗親行赤日中督捕數  
日而盡金川用兵部署臺站民不知擾去任士民焚香遮道送

至境外

桐城縣志

方夢袍字民賢桐城舉人知安遠縣俗親喪演劇靈前名曰餽  
喪夢袍拘其主喪者荷校以徇又死者葬已數年復闢柩舉骸  
骨就水刮剔名曰洗筋禁之不止乃依律治之風始革邑九龍  
山產茶歲貢常例外輒多徵數十萬斤夢袍請於上官減十之  
三著為令民甚德之

桐城縣志

戴涵字華渚桐城舉人知玉屏縣調普安有爭地互鬪者前任  
以民變聞大吏擬用兵涵往接篆力阻之遂親赴為定界拘首  
惡責治事得寢升安順府知府土官某叔姪爭襲涵勸諭感悟



孝友終其身擢貴西兵備道金川用兵檄辦軍餉以勞成疾告歸卒於漢陽舟次黔民無不感泣

桐城縣志

李宗典字鴻遠懷甯人考授州同知借補仁和場大使雍正間海潮為患大吏委視隄工亟督築翁埠隄至李家村五里工甫畢而海嘯至蘇松皆被災杭獨無害委濬海塘引河有老人告以借濬刷沙之策得清水源於蒲草窪疏浚十里而引河成乾隆初擢柴塘通判浙民德之乃泐於石以誦其功以艱歸改畱江省補用十一年委勘無為州江工江南岸高水北衝宗典謂當與水爭不當以地讓令民於北岸迎衝之處載土沈舟引濬而東果得岸出濬移民無江患尋補徐州通判宗典謂徐界黃運二河之交又東省湖水下注非廣浚溝渠不足以資蓄洩而備旱澇因具圖說於冊議請舉行會去不果後擢金山海防同

知卒

懷甯縣志

熊仁泰字紫田潛山人知山東朝城縣廉能有聲會天旱步行二十餘里禱雨龍神廟士民為設饌甚豐仁泰見村童令持其所食來則糠粃雜豆箕也曰民食如此何能下咽命瘞之雨立注朝城人至今祠祀之

潛山縣志

陳道濟望江人乾隆二十六年四川閬中知縣愛民重士善察情偽奸猾不能欺振興學校考課嚴明文教因之不變邑雖繁劇一時有政簡民安之慶

四川通志 新增

魯晉字詎疆懷甯人乾隆乙丑進士初署惠安邑地濱海民開田受潮取鹽課有贏餘晉毫不私舉以償民逋欠補松溪縣湛盧山有鐵鼎每禱雨迎入城輒應歲旱吏以為請不許惟虔誠齋禱甘露立沛鄉有童子被殺晉傳諭於近村五里稽查戶口



母許隱漏一名有嫗自言子出外已五日即詣嫗室搜得童子

白銀繫項圈擒其子一訊而服邑稱神明後以母老改鎮江府

教授著有周易微言養素齋詩古文懷甯縣志

方玉麟字耕杞桐城人乾隆戊辰進士揀發湖北歷署松滋咸

甯鄖縣在咸甯築長隄以禦洪水鄖與蜀接壤烏道欵寄捐俸

開通往來者蒙其利率於官家無餘財聞者傷之桐城縣志

周大魁字鴻庭桐城人乾隆庚午舉人知泗水縣改全椒教諭

卒於官士林感其德教子孫遂家全椒全椒縣志 舊志 滁州流寓 新移

張曾敞字愷似桐城人乾隆辛未進士選庶常授檢討歷擢至

侍講學士自文端至是四世侍

經筵矣敞才器通敏博識古今事宜及一切掌故而持己清峻三校

順天鄉試眾皆知其公慎廉介己亥分校會試榜發為忌者摘

其所薦梁泉卷下吏按驗事雖白而竟以此坐廢時論惜之後

萬壽加恩復五品頂戴桐城縣志

左衢字賡唐桐城人乾隆壬申進士由內閣中書擢宗人府主

事嘗充庚辰順天同考乙酉陝甘副考官遴拔皆得人平生無

疾言厲色而持正守潔莫敢干以私卒於官時論惜之桐城縣志

張若淳字聖泉桐城人由刑部主事歷府道卿尹至刑部尚書

宣力中外五十餘年舊制內閣衙門非科甲不與乾隆丙午奉

旨升授內閣學士有張若淳非他臣可比嗣後不得援以為例之

論天下榮之在內閣時奏請各督撫講求伐蛟之法及教民種薯以為

救患防災之計在刑部案無巨細必反覆推求期於無枉無縱

而後已若淳居心縝密每有建白疏入輒焚其稿家人不得知



嘉慶壬戌卒於官

賜祭葬贈太子少保謚勤恪

桐城縣志

張若瀛字印沙桐城人兄若淮仕至左都御史為人端凝樸慎而若瀛慷慨強果始以書館膳錄授主簿借補熱河巡檢畱守內監為僧者曰于文煥一日行道見其橫肆立柱之內府總管直隸總督皆以擅杖近御奏

上不之罪後為良鄉知縣順天南路同知畿南多回民相聚為盜若瀛多布耳目親往捕之獲百餘為盜所誣以枉良革職

上見其名交軍機處覆問滅其罪發甘肅以知縣用署張掖復營兵所奪民渠水利又請除黑河沙漲廢田數百頃糧稅引疾歸以子鴻恩為兵部郎中

封朝議大夫

桐城縣志

吳元念字在宮桐城人官雲南建水知州有治蹟攝臨安知府蒙自縣民呈控某鎮有聚眾滋事者密諭健役拘數人至視其械皆防夜之具乃鞫誣首者服罪而盡釋之民藉以安他若建書院立橋梁滇人頌德不置內升戶部員外郎乞養歸

桐城縣志

勞敦杰字殿欽懷甯人乾隆甲戌進士知山西岳陽縣晉俗滄

樸歲時之吉縣老人及婦孺多至署爭致果品等物輒與言孝

友廉讓轉相勸化獄訟衰息調介休牒未下有邑豪某交通官

吏預知狀試陷以利佯為好語卻之及到縣果以事相干立斥

其罪一縣感悅今岳陽介休皆立有勞公祠

懷甯縣志

馬家良字仲衡懷甯舉人知新興縣訟者至庭陳譬設喻往往

感悟自去徵課聽民自輸不遺胥吏下鄉曰此輩最病民凡為

宰者宜首念也歲大水具狀請賑先支廉俸二年給之不足益



以衣裘簪珥凡五千餘金所活甚眾後擢貴州正安州再起署

四川會理州以艱歸旋卒子光輝初官訓導後擢同安知縣調

河閒值歲荒賑卹有法調望都有大吏家人騷擾驛站立杖之

再調宛平以事罷官

懷甯縣志

楊樞字瞻斗懷甯拔貢署上海縣丞時徐州蝗起奉檄捕治徒

步夜率民役秉燎火焚之預掘阡坎且焚且瘞蝗不為災擢太

倉州同

懷甯縣志

李國麟字惺齊懷甯人乾隆壬申進士知邵武縣歷長泰南安

等縣調成安為令三十餘年老於吏事治疑獄往往出人意表

發其奸伏人以為神後擢兵馬司正指揮卒

懷甯縣志

石文成字聞涿桐城人以諸生考職選長沙縣丞升城步知縣

擢寶慶府通判為政抑豪強恤孤弱凡蒞任之鄉民皆尸祝咨

部以知州用未選而卒所輯有歷朝詩話著有曉堂集十二卷

桐城縣志

龍承祖字企軒望江舉人官刑部主事歷擢至江蘇按察使官

刑部時折獄平反讞一案必折以例議一事必察以情及陳泉

三吳稽案牘錄囚徒廉明忠厚一如其在部時以勞卒官

望江縣志

王鳳詔字奉書潛山人以聞官蓄洩有功擢鉅野主簿歷升至

泃河同知調上南河同知越歲餘伏汎南趨楊橋大壩被衝鄭

州十八堡中牟十堡皆危急鳳詔晝夜區畫備極勞瘁隄獲保

全大計得上考旋奉檄監理祥符隄工目不交睫者數旬以勞

卒官開封人立祠祀之

潛山縣志

趙之璧字明川桐城人以舉人知北流縣縣多惠潮流民夜聚

曉散有張大眼者以事到官察其情狀陰險即命役同保長至



其家搜捕則賊窩也按律定擬惡黨皆散安南內訌奉檄署鬱  
林州兼理陸川縣事復帶佐貳等印凡七職供給軍行事理而  
民不擾後以運銅卒於差次民皆泣下

桐城縣志

方世仁字松樓桐城舉人知邵陽縣邑多健訟世仁勤於聽斷  
有審理數千案冤屈無一場之謠邵糧向係都差代揭知其病  
民不許並禁採買派累告歸百姓圖像刻石以誌盛德

桐城縣志

張曾敏字遜求桐城人官南陵縣訓導升山西靈石知縣縣有  
派採馬草之例抵任即革之而民困蘇且禁攔截過客車馬以  
便行旅調屏山增城浚隍修書院金川用兵任轉運之役籌畫  
盡善大吏咸倚重之

桐城縣志

章攀桂字華國桐城人以捐職知縣補甘肅渭原調武威鄰邑  
有久逋巨盜親捕獲之擢鎮江府知府調江甯

高宗純皇帝南巡議開鎮江至江甯水道攀桂奉委於攝山下故河鑿

通百里直達丹徒謂之便民新河

御舟安速而商民亦得避大江之險後以四府糧道被議仍授松太道

乞養歸

桐城縣志

金之忠字啟宗桐城人由高陽縣丞擢知玉田縣築隄禦水人  
稱曰金公隄升河間同知獲武清劫盜及天津重案渠魁擢曹  
州知府調濟南清釐百七十餘案授宜昌府知府楚方用兵隨  
赴軍營辦餉團結鄉勇防堵要地略無遺誤

賞戴花翎署荆宜施道以勞卒

賜祭葬贈道銜

桐城縣志

吳逢聖字眉爽桐城舉人官興化教諭歷臺灣府知府善決疑  
獄多所平反不事鞭扑而情事皆實解組歸粹與洋匪船遇賊



皆曰是好官相戒弗犯而去桐城縣志

倪企望字穎田桐城舉人知長山縣歲荒請賑盡心籌畫民不知饑飛蝗入境掩捕立盡課農桑葺邑乘為同考官所拔多知名士移冠縣邑人請於巡撫復留長山以老致仕歸桐城縣志

黃良棟字晉僊桐城附監生肄業成均祭酒保薦桐城縣志

廷試經策以知縣用授直隸赤城署龍門調武清護府篆治績循

良祀名宦祠桐城縣志

姚葵字香菫桐城人乾隆辛巳進士由甘肅靖遠知縣歷官至福建巡撫其知臬蘭日釋冤民張舉獲巨窩馬得鼈旋守安陸調武昌緝盜安民平反冤獄觀察汀漳嚴緝龍溪長泰劫案盜始斂跡及攝藩粵東開墾濱海沙坦千餘頃撫江西疏建豐城石隄以備旱澇至今利賴福建沿海奸民濟糧通盜乃嚴飭澳

甲坐容隱者以罪俗乃漸除所著有恭壽堂集八卷桐城縣志

張曾敷字譽長桐城人乾隆戊子解元初官福建鹽場大使歷廣西慶遠知府貴州貴西道宦轍所至苗民雜處曾敷本經術為治張弛激揚動中機要有古循吏風以母憂歸桐城縣志

胡業宏字岷堂桐城舉人由教習知趙城縣民有訟者即坐堂上訊斷之日決數十案無不服其明察以病歸既歿同里有過

趙城者父老聞之喜曰此吾神君之鄉人也相與餉之問起居聞其死皆哭失聲著有芑堂詩文集桐城縣志

左周字逸澤桐城人乾隆己丑進士選庶常授檢討改御史晉給事中嘗同考庚子辛丑鄉會試稱得人出為浙江甯紹台道

理關權釐積弊署布政使猾吏利州縣侵虧有以虛領虛解高下其手者廉得其實從嚴懲治晰款句稽遂得實數後坐失察



降調歸桐城縣志

楊全蘊字月舫懷甯人乾隆辛卯進士知泰甯縣葺書院贈膏火親詣聚講嘗斃寶蓋巖寺淫僧於杖下一縣稱快城外棲鳳山有物為祟能攝致小兒食人牲畜檄山神毆之助以火器怪遂絕以老乞休羈公事不得歸縣民日以薪米送邸舍數年卒民又請於大吏配享宋三賢祠懷甯縣志

吳貽誠字荃石桐城人幼工詩文以貧就主簿職揀發直隸河工補交河主簿遷大城丞會尚書阿果毅勘視三灘里河隄總督命貽誠隨行事竣果毅歎為不易才攝東安縣篆有兄弟爭訟諭以大義皆感悔泣下升知靜海葺書院增膏火邑瀕海遇旱蝗起乘其未飛募民撲之歲乃有秋踰年邑復遭水力請上憲按籍給賑存活無算改授新河令以勞卒於官桐城縣志

張曾份字安履桐城廩貢官臨晉縣知縣調南皮遷知大興邑多貴人世家執法不撓擢順天南路同知以定水漲過往文安護隄自夏徂秋晝夜勞憊隄得固而病作卒於官桐城縣志

汪志伊字稼門桐城舉人充四庫全書校對議敘補山西靈石知縣升霍州知州代州民孟木成為人誣以殺死張光裕既定讞矣志伊訊得其冤執以為誣木成卒得釋名由是起擢鎮江知府調蘇州晉蘇松糧道漕政肅清升江蘇按察擢甘肅布政調浙江嘉慶初以事降江西按察旋升福建布政擢巡撫五年入都疏陳漳泉積習及應辦事宜一慎選守令二責成久任三革除蠹役四整飭營伍奏入

允行以病乞歸八年病痊入都署副都御史刑部左侍郎赴江西鞠案途次



簡任江蘇巡撫洪澤湖義壩衝決亟往履勘奏請賑卹淮揚十一州縣  
之被災者其秋江徐松海太被旱復請緩征賑卹民慶更生十  
一年升工部尚書旋授湖廣總督自昔江漢汎溢沈浸民田或  
數百年且數百里志伊泄任審其要害奏請建閘濬河涸出舊  
田及新淤成田者數百萬畝其察江盜尤嚴法密令行根株盡  
絕十五年調閩浙總督嚴治洋匪會匪擒巨盜黃治誅之降者  
奏請發往黑龍江安插又嚴行懲辦天地雙刀等會宵小遠跡  
二十二年以福建藩司李賡芸為改教知縣朱履中誣訐自盡  
鐫職歸桐城縣志兼採姚鼎所作壙銘  
江濬源字岷雨懷甯人乾隆戊戌進士授考功司主事晉員外  
郎又晉稽勳司郎中己酉典試陝西出為臨安府知府訟者至  
呼就案與言有兄弟爭財論以骨肉之義皆泣涕求去歲巡視

郡縣水道建水瀘江象冲塌冲三河及習峩猊練江多水災設  
法捍禦漑田無算修葺書院勸修橋梁五六十所復義學五十  
九所嘉慶二年興義苗叛募鄉勇防禦民得無恐石屏地震壓  
斃四千餘人其存者為捐廉煮粥葺棚以安集之後攝池南道  
篆引疾歸在臨安時禮社江六蓬渡有物為災時覆人舟濬源  
為文祭神其夜大風雷鳴若有物隕墮崇竟滅著有介亭文集  
筆記居暇邇言諸書記鄉賢懷甯縣志  
韋帶字道存太湖貢生授清河教諭性情醇樸教人先德行後  
文章當事重其品學請主崇實講席成就甚眾致仕歸卒年九  
十太湖縣志

劉逢奇字贊平望江舉人知豐城縣恃長隄為衛壬子夏水  
決壞民廬舍逢奇繪圖上請修築日置身版築間後改貴州餘



重刊... 卷一百六十一  
慶令署永甯州永故苗疆又遭兵燹撫綏招徠不遺餘力以勞

卒官

望江縣志

方維甸字南耦桐城人總督觀承子乾隆丙申

上巡幸山東以貢生在良鄉接

駕

特賜舉人內閣中書充軍機章京庚子成進士授吏部主事升員外郎

從征臺灣事平遷御史己酉典廣西鄉試擢給事中從征廓爾

喀凱旋歷通政司副使光祿寺卿甲寅轉太常典順天鄉試乙

卯知貢舉授長蘆鹽政嘉慶元年左遷刑部員外己未分校禮

闈以內閣侍讀學士治軍關隴庚申出為山東按察使辛酉授

河南布政使時楚省邪匪未靖督率兵勇駐劄江岸設卡防守

壬戌疏奏大功告蕝裁撤鄉勇最為要務須在議撤官兵之前

癸亥調陝西布政擢巡撫是時零匪藏竄鄉勇未撤搜捕籌辦  
所繫全陝安危甚鉅丙寅甯陝鎮新募兵丁滋事急飭地方官  
勸諭寨民修寨自衛賊無所掠事平疏陳善後事宜皆下部議  
行己巳授閩浙總督剿除蔡牽餘黨洋面肅清渡臺辦理械鬪  
嚴法示懲疏奏班兵定例及營汛應當歸併增設之處皆照所  
請行旋以母老陳情歸養

恩旨俞允癸酉丁母艱值滑縣逆匪滋事奪情授直隸總督維甸疏辭  
即請馳赴軍前效用奉

旨回籍守制乙亥疾卒於第

賜祭葬贈太子少保諡勤襄子傳穆

恩賜進士准其一體殿試

桐城縣志

余德洋字宗海太湖人乾隆庚子進士選庶吉士改戶部主事

重刊...

卷一百六十一

人物志

宦績

七

安慶府



舊陝中陣亡者父母存皆按冊給糧有議裁革者德洋力持不可曰我

朝以孝治天下身死王事而其親不免飢寒豈

聖主意哉議遂寢諸大臣皆趨之方擬薦用遽以疾卒年僅二十八湖

縣志

李長森字蔭原太湖人乾隆甲辰二甲一名進士授主事歷郎中擢御史典試河南廣西視學湖北分校禮闈皆稱得士出爲福建鹽法道調山東兵備道修學宮造海船捕蝗輯盜多善政升貴州按察晉布政以事解任授主事復出爲蘇松常鎮太督糧道革除陋規嚴治蠹棍漕法一清署江甯布政有守備陳某誣訐副將王占鼇侵蝕兵餉王幾自戕爲廉得其情事遂白其他平反冤獄多類此擢雲南布政清釐銅務安輯邊徼調福建

以親老改江甯治績如前荒政尤著乞終養歸

太湖縣志

張曾誼字正夫桐城人刑部尚書若淳子也初任廣西義甯臨桂知縣乾隆戊申征安南調赴行營辦理軍務凡他人所不敢爲者皆身任之時大學士福康安爲總統深加禮重事竣保薦

聖諭嘉獎

由知縣不次擢用至浙江按察使嘉慶丁巳卒於官

桐城縣志

方受疇字次耘桐城人以鹽課大使加運判揀發兩浙歷官至清河道嘉慶己未因事赴伊犁効力甲子入京授蘇松督糧道改通永道擢河南按察使調直隸升布政使癸酉巡撫浙江調河南值河漫睢州賊據滑縣整頓撫綏勤勞備至丙子總督直隸

上將如奉天值大雨灤河橋圯三日告成

溫旨褒嘉加其子烏程知縣秉知州銜庚辰

重修安徽通志

卷一百八十一

人物志

宦績

大

安慶府



宣宗成皇帝奉

仁宗睿皇帝梓宮由熱河回京古北口至車道溝險峻難行受疇馳驅

相度鑿山開道修整寬平克襄大事加太子少保銜積勞成疾

陳請開缺回籍調理奉

旨俞允行至濟上卒於途遺疏上蒙

恩卹賜祭葬

桐城縣志

方觀鯉字心莊桐城人父蔡歲貢生以義行稱於鄉里觀鯉舉

乾隆戊申鄉試充方略館謄錄議敘官南河東臺桃源縣丞署

高涪如皋兩縣篆發奸摘伏民人感畏署山陽漕運千總縱妾

凌妻至自盡漕督庇之觀鯉執法不阿觸其怒遂自請解職後

擢甘泉平反江都民周氏子逆倫案明允有聲

桐城縣志

蔣振萬字虎臣懷甯人以四庫館謄錄議敘縣丞分發湖北嘉

慶元年署長陽知縣教匪偪縣縣所募鄉勇散守村堡振萬懷

印夜縋城出走各村糾集鄉兵有不信者以印示之遂率以擊

賊敗之又隨大兵敗賊於聶家河又焚燬王母洞賊巢渡河殺

賊無算又攻奪陳家湖及灌灣腦各處賊巢蒙

賜藍翎

並六品頂戴尋以疾卒

懷甯縣志

丁拱辰字靜齋懷甯人四庫館謄錄議敘縣丞分發湖北署歸

州判嘉慶元年募鄉兵駐新灘禦賊獲三十餘人賑濟難民記

大功三次後改發山東補惠民丞調掖縣以年老歸

懷甯縣志

江澐字蓮溪懷甯人官廣西臨桂縣六塘巡檢調宜山縣白土

司白土在萬山中獠獍所集例禁漢民竄處有廣東惠潮客民

潛入盤踞引黨剽奪甚苦之澐請發兵驅之出境夷民安堵

又楊某爲人所誣論大辟爲白其冤釋之

懷甯縣志



方承孟字守陬懷甯人由方略館議敘揀發雲南補河西縣典史署曲江司巡檢拉里黑土夷恃阻遠抗稅吏至輒反縛沈之江承孟夜率鄉兵深入百里捕獲其酋疾馳載去己以數騎斷後追者數百至叱之曰酋已去敢動者大兵到無噍類矣眾驚愕遂巡散性敏於聽斷署布政司經歷請假便宜行事民詣司言狀者案無畱牘後署廣西州五嶠州判楊家寨土夷嘯聚千餘復深入獲其渠餘諭以恩威悉感服散去大吏以卓異薦尋卒

懷甯縣志

李豐特字西池懷甯人以縣丞借補甘肅階州吏目署紅水縣丞歲旱迫不及賑典衣借貸散給貧戶大吏嘉之委署巴燕戎格通判時昂拉等族番賊搶奪牲畜傷斃土民豐特前往宣諭番眾畏懼獻出賊首二十餘人即實授通判歷署西甯府及安

西州事旋卒

懷甯縣志

蕭應值懷甯拔貢乾隆中官廣東瓊州知府勸農輕徭省訟釐奸建瓊臺書院人材多所造就在任十年民敬之如神明親之

若父母

瓊州府志懷甯縣志

終湖北襄安郎道

舊選舉志

張誦字惠常桐城舉人乾隆中官山東汶上知縣向章殺汶壩歲費椿木薪料皆取給於民誦請官辦薪料而自捐五百金采買木植又汶民歲出軍需車輛亦請改官運及去任汶人立碑

頌德

桐城縣志樹文集 方東

楊世綬字金佩宿松監生江蘇巡檢乾隆乙巳大饑委辦賑務逐口親給升縣丞署丹徒知縣督數千人濬運河終江陰知縣

宿松縣志

新增

石飛熊字渭占宿松舉人乾隆中任直隸新河知縣捐廉修書



院築邑西河隄初邑有改河之議河改則新河冀州甯晉隆平

坐受河患飛熊力請得寢調邯鄲詳減差徭之半洊升廣平府

知府降補通判卒祀新河名宦

宿松縣志  
新増

趙玉字藍生桐城人嘉慶己未進士選庶常改工部主事升郎

中癸酉林逆滋事部曹星散玉至署有自署出者要與俱玉曰

此何時忍言去乎入見長官長官大喜令督火藥局與兵役雜

處不食三日擢知漢陽府事楚省沿江有籌備經費存於商既

支用而徵息如故洲地升科復淹沒而催稅如故皆力陳大府

免之辨漢川民張正豪之冤獄置黃陂逆子以極刑皆執法不

徇漢陽故沃壤在任六年一無所取及歸囊橐蕭然惟書十數

廚而已著有粵游燕游漢上吟諸草求己齋集及漫錄語錄諸

書

桐城縣志

姚興潔字香南桐城人乾隆乙卯湖南苗匪滋事興潔投筆從  
軍經略福康安奇之以理問銜檄往鳳凰廳協贊同知傅鼎軍  
務廳駐鎮筸爲辰沅要地苗兵突至佐鼎謀畫捍禦圍解調隨  
大營大功告成累擢茶陵知州興潔以苗酋雖擒兩頭洋諸寨  
猶未下自請隨營調鳳凰廳同知銳意擊賊遂破兩頭洋大寨  
上尙寨苗僞請降乘天雨直入擒其酋而歸嘉慶甲子事平戊  
辰擢署辰沅道辛未實授奉

旨褒嘉謂與傅鼎後先繼美卒於官苗民感之哀動山谷相率數千人  
赴撫署求建祠以祀巡撫以聞

上許之時傅鼎先歿乃爲祠并祀之曰二公祠

湖南通志  
桐城縣志

趙文楷字逸書太湖人嘉慶丙辰狀元授修撰己未琉球國請

襲封奉



命賜麟服充正使持節東行五晝夜渡大洋萬餘里禮成其國厚致  
賂遺堅卻不受廉潔之聲著於海外舉國敬禮特為立祠為前  
使所未有既復

命旋以艱歸服闋入都出為山西雁平兵備道以勞卒於任著有楚游  
稿獨秀草堂古今文其出使有槎上存稿舊志

王廷元字中和太湖人嘉慶壬戌進士知山東堂邑縣在任八  
年有慈君生佛之稱邑有雀成書院廷元公暇即手所錄經義  
要旨一書與士子諄諄講論吏而兼師一邑懷之太湖縣志

徐之千潛山人官舒城教諭倡修學宮儀門大成殿及圍牆甬  
道竹頭木屑皆為經紀又植槐柳數百株輪囷森列今猶識其  
手澤焉舒城縣志 舊志廬 新移

劉國策字簡堂太湖人嘉慶甲戌進士知四川梓潼縣有聲歲

饑為粥以食餓者不足則稱貸他邑以益之全活甚眾卒於官

民祠祀之太湖縣志 以上舊志

徐詔字蔭村宿松舉人江西知縣任臨川捐廉助賑任永甯助  
書院膏火任弋陽受代去父老遮道送之稱好官云嘉慶初任

進賢卒宿松縣志 以下新修

姚莆字勤若桐城人嘉慶初官河南商城知縣捕豪猾雪冤獄  
賑旱災修河隄有治績升陝州知州病歸議永惠倉積穀法籌

濟水荒饑民倡捐修理學宮皆有裨於鄉邑桐城縣志

熊象階字松樵潛山拔貢河南知縣歷衛輝府知府在河南三  
十餘年辦兵差籌荒政清廉率屬有循良第一之目潛山縣志

曹松篁字友竺宿松進士嘉慶初官福建海澄知縣愛民禮士  
修城池興水利家產皆以官盡及卒海澄人祀之宿松縣志



丁燮字友堂懷甯拔貢嘉慶中任江蘇蕭縣教諭倡捐興復龍城書院委勘水災全活凍餒籌濬岱山浼溝二河民食其利孝子鄭立本尋父西域負骨歸葬為請獎完娶教之讀書及告歸捐田建塾教族中子弟著有禹貢輯解懷甯縣志方立功字允卿桐城人由供事任甘肅土魯番巡檢善撫回民時有麪戶過糶居奇激變之事賴立功得解升廣西全州吏目有以賄屬其杖人者拒之曰某豈鬻杖者哉立功素不輕杖人謂一受官刑辱祖先恥子孫宜慎也道光八年卒官囚號於獄士民哭於堂桐城縣志方潛家傳

李宗傳字孝曾桐城舉人嘉慶中官浙江知縣在麗水清釐積案七百餘起在平湖出冤民毛建龍於獄山陰陳某陷朱姓以朋毆重案宗傳訊獲正凶時稱廉明道光初游授浙江糧儲道請減漕額疏濬浙西諸水緣事降調選湖南永州府知府修濂溪書院教民植蔗及木棉升四川成縣龍茂道議剿我邊十三支夷匪並捐助軍需銀五千兩拾淵乎鋤牛等百餘人勒交難民無算以功卓異

簡放山東按察使懸賞捕獲著名盜首擢湖北布政使告歸桐城縣志

葉灼字仲平桐城進士河南南召知縣嘉慶初值教匪齊王氏之亂滅徭役籌軍儲城守以固署鄧州時裕州有殺人獄株連無辜請調灼鞫訊果得其情於是兼署鄧裕二州終甘肅洮州同知祀裕州名宦祠桐城縣志

左德慧字石僑桐城優貢歷江蘇豐縣安徽全椒訓導終吳江教諭訓士有法則日夕講授若為童子師崇實學敦名節能勤其職時以德慧與福建鄭兼才並稱二教諭姚瑩文集桐城縣志

重修安慶府志 卷一百一十一 人物志 宦績 安慶府



郝同燮字雲士懷甯舉人初以歲貢教職署鳳陽含山廣德各學官所至振興文教培植孤寒

懷甯縣志

張聰賢字愛濤桐城進士由庶吉士改陝西知縣先後兩任長安縣創立義學二十餘所力行講約保甲風勵節烈濬蒼龍河築隄岸立歲修法長安咸陽鄠民田皆免河患升補潼關廳同知道光十一年卒官祀長安名宦祠

桐城縣志

龍鯉門字澤堂桐城進士河南知縣道光初署上蔡嚴懲奸黠以雪冤得民心調固始訪為民害者盡法治之升知州委勘上蔡河隄工段以勞卒上蔡人請建祠祀之

桐城縣志

李振祐字錫民太湖進士嘉慶間由中書洊歷御史戶科給事中奏請嚴禁考試八旗騎射替代弊端劾郎中錢學彬違例截取及都察院玩視察典輒將六法之員改列供職

上俱是之補通政司參議督學山東擢內閣侍讀學士奉

諭密奏東省積弊一曰吏治叢脞二曰案牘壅滯三曰緝捕無策四曰

錢糧不清又參劾東昌府知府熊方受王果並褫職道光二年遷太僕寺少卿父憂歸服闋累擢宗人府府丞奏請整頓五城捕務二十八年以安徽水災捐銀四千兩借賑下部優敘

加太子太保銜因病開缺三十年卒蒙

恩賜祭葬如例諡莊肅

史館鈔傳太湖縣志

李振翥字雲軒太湖進士由編修知陳州府豫皖捻幅諸匪竊發振翥殲渠解脅懾不敢動以河工出力擢天津道道光壬辰水災修築隄閘遷廣東鹽運使捐建麻風院育嬰堂擢陝西按察使調山東募勇剿辦馬匪擒盜首抵罪餘黨解散積勞卒官父清樂善多義舉振翥承父志建義倉修路施渡規畫皆可久



太湖縣志

徐鏞字詠之桐城進士由庶吉士改主事歷郎中道光三年任福建汀州府知府興復龍山書院調浙江甯波平反於潛諸暨巨獄守嘉興清漕案八百餘起裁規費浮收諸弊捐瘞積棺八千餘具累擢順天府尹壬辰夏旱咨直隸總督准各屬出倉穀糶賑復請

旨通飭清釐常平額積增建義倉

詔從之終太僕寺卿

桐城縣志

王步鼇字雲翥太湖舉人河南知縣任濬縣最久修學宮建考舍葺祀祠立育嬰廣仁諸堂邑故患水示民宣禦之法以勞卒官濬人祠祀之勒石以紀遺愛

太湖縣志

姚柬之字佑之桐城進士道光初任河南臨漳知縣興市肆息

訟獄承辦水災全活甚眾母憂歸起補廣東揭陽俗好仇殺攘

奪屢梗賦稅束之剿平下灘匪徒置催科止鬪二旗親歷四鄉

分別勸懲由是械鬪風息賦稅如令著有漳水圖經連州綏徭

廳志

桐城縣志

李世彬字子蔚太湖進士道光初浙江知縣母憂歸起補四川

灌縣洊升知府為政寬恕實惠及民在浙雪遂安冤獄賑富陽

災黎在蜀脫巴縣死囚除合州鹽弊尤為時所稱富陽合州均

祠祀之

太湖縣志

石綸字愚泉宿松進士歷吏部郎中道光乙酉湖南副考官壬

辰甲午順天鄉試辛丑會試同考官皆破除情弊得士最盛居

官未嘗干人以私清直有聲居家有義行卒祀鄉賢

宿松縣志 汪維城

味腴齋文集

重修安徽通志

卷一百八十一

人物志

宦績

三

安慶府



何俊字亦民望江進士歷官廣西知府毀桂林九娘廟淫祠雪象州盜案死罪五人卒獲真盜擢大名道諭民聯莊守衛匪徒斂跡洊升江蘇布政使實心實政為時所稱著有夢約軒詩文集

望江縣志

方傳穉字穎齋桐城人由河南通判歷福建臺灣知府剿捕鳳山亂民總司籌辦悉協機宜擒獲匪首解散餘黨洊擢浙江甯

紹台道

桐城縣志姚瑩東槎紀略

王之道字春如太湖進士道光初任江西鉛山知縣置鵞湖書院膏火田數頃有慈父嚴師之頌調豐城捐廉增建隄閘以弭

河患升蓮花廳同知卒著有四湖詩文集

太湖縣志

徐峴字宇陵桐城人山西同州府經歷升鎮安知縣廉靜寡欲多善政維持風化保衛民生著有鎮安學治錄卒祀名宦祠

桐城

縣志

方心簡字在亭桐城歲貢江蘇吳江知縣道光中署無錫時海疆用兵營於惠山有擾民者心簡擒而杖之捐修吳江長橋互

數十丈行道稱便目為方公橋

桐城縣志引江蘇通志

方為霖字壯猷桐城人湖南耒陽知縣道光十五年趙金龍之亂城守百四十餘日援至圍解城賴以全嘗鞫獄釋無辜百餘

人

桐城縣志

謝益字子遷桐城舉人河南汜水知縣道光癸卯水災親督工役開濬河道數月疏通水始歸壑民稱再生

桐城縣志

光聰諧字律原桐城進士由庶吉士改官刑部主事洊升郎中平反誣奸等案精心讀律不事請謁時人為之語曰冷何來光

聰諧道光四年授湖北荆宜施道六年江水漲沒四十八垸籌



卹災民九年隄決請銀十三萬督同荊州知府裕泰辦理工竣  
 稱為光裕隄歷官直隸布政使俱稱職以疾歸前後捐賑萬數  
 千金置田祭祖贍族著有稼墨軒詩文集有不為齋筆記桐城縣志  
 潘光泰原名羣字掌文桐城舉人道光中貴州知縣署天柱以  
 卻萬金賄知名歷貴定清鎮補安平調遵義所至以培文教厚  
 民生為務興水利建義學義倉教民飼蠶植棉凡所建置  
 皆捐廉倡之在遵義首禁控狀添詞革正帖旁帖冷帖激帖諸  
 弊清積案七百餘起以疾歸士民攀送不絕獨無一隸胥送者  
 既去民立遺愛碑卒祀貴定安平名宦祠桐城縣志 友芝亭文集 莫  
 徐國蘭原名坤字芷卿桐城舉人道光二十三年官績溪教諭  
 修學宮建考棚教民種棉紡績著有興棉說約六卷刊行以憂  
 歸士民立去思碑桐城縣志

施仲鱗字輔南太湖舉人道光中歷任雲南知縣皆有治績曲  
 靖漢回互鬪巡撫飭盡殄城內回民以仲鱗言獲免曲靖人口  
 祝之任鎮雄州殲黔匪於西里擢開化知府署昭通單騎抵回  
 寨曉以大義護之入城斬漢練首為民害及回民之倡亂者恩  
 威大著以剿辦蜀滇黔接壤土匪功卽補道員卒昭通民請祀  
 名宦祠太湖縣志

王用賓字禮之懷甯進士江蘇儀徵知縣捕治沙漫洲盜江面  
 肅清請淮南引鹽仍至儀徵改捆民食其利道光辛卯大水設  
 棚賑粥及春籌給牛種訊斷明敏無宿獄累官江西吉安知府  
 卒懷甯縣志

潘政舉字樹人懷甯進士道光中陝西知縣善決疑獄所在有  
 惠政署佛坪同知倡修學宮籌增膏火署咸甯嚴治教匪剴論



良民調補大荔和輯漢同刀匪斂跡升鄜州知州卒官懷甯縣志

汪先煥字嚮之桐城進士咸豐初由主事改貴州知縣以軍功

升獨山知州署綏陽縣迭次捐資募勇會殲悍寇力保危城十

一年署仁懷廳卒官桐城縣志

程汝霖字敬亭潛山人廣東澄海縣梓林巡檢平外沙村奸民

之亂洊升知縣署平遠擒治大猾調普甯龍門剿山賊有功潛山志

縣志

儲敷恩字訥旃潛山人貴州典史委辦思南紅絲塘苗案為除

苛禁立義學義田安輯教養之攝鎮遠縣丞時邛水苗多劫案

親入苗寨諭縛首亂二十六人以獻潛山縣志

李仙根字翠含太湖歲貢署無為州學正疏濬黃絲灘修築貓

山下隄民慶安瀾署霍邱學宮傾圮倡捐移建又倣范氏義莊

捐田贍族太湖縣志

方木生字治鋒太湖進士刑部主事擢員外郎總辦秋審處精

心釐剔雖除日無休沐暇性彊直意所不可輒侃侃爭上官不

能奪太湖縣志

徐引字觀藻宿松進士廣西馬平知縣擒逆首韋扶果升署思

恩知府肅清二匪圍偽翼逆石達開之弟石鎮吉於安定土司

境內擒之并殲其家屬餘黨以母憂去官卒宿松縣志

孫起端字心筠桐城進士選庶吉士道光初改主事累擢給事

中稽查天津倉儲上疏極陳漕運之弊尋授貴州糧道廉以自

奉罷所屬府州歲供復義學尚節堂詳立規制署按察使出誤

坐死囚平反成獄之輕重失當者會粵寇初起上書巡撫言黔

粵唇齒宜練兵奏請赴粵合剿不能用咸豐元年卒官桐城縣志



姚瑩字石甫桐城進士嘉慶十九年選福建平和知縣調龍溪甚有威惠士民畏愛之調臺灣毀五妖像署噶瑪蘭通判獲巨盜林牛等緣事降調道光十年起江蘇知縣歷元和武進督修孟瀆三河累擢淮南監掣同知升署福建臺灣道

諭曰臺灣為海口要區非熟悉情形才守兼優之員不足以資表率淮南監掣同知姚瑩前經陶澍等保舉朕於召見時察其才具明白諳練曾任臺灣知縣噶瑪蘭通判於該處情形較為熟悉著升署臺灣道并賞加按察使銜十八年任事擒獲嘉彰賊胡布等二十年洋船窺伺臺灣二十一年再犯雞籠均擊敗之並剿平南北兩路逆匪疊奉

諭旨嘉獎賞戴花翎給雲騎尉世職二十二年復破之於臺港奉有智勇兼施不負委任之

諭賞加二品頂戴仍交部優敘會撫議成被劾逮問下詔獄凡十二日

而出發往四川補蓬州知州告歸三十年

文宗硃諭姚瑩前在臺灣盡忠盡力等因授湖北鹽法道馳驛廣西參

賽尙阿軍務尋擢廣西按察使圖滅賊六策力請斷賊外援咸豐二年畱署湖南按察使卒官著有東溟奏稿文集詩集東槎紀略康輜紀行寸陰叢錄識小錄姚氏先德傳都八十九卷

桐城志

方鴻徽字怡青桐城人江蘇婁縣巡檢所駐南接浙江嘉興有巨盜顧雙喜沈阿三聚眾剽掠屢捕不獲檄鴻徽會剿鴻徽請先往諭以大義咸感激解散又倡建永豐倉全節育嬰救生掩埋諸堂局後水災居民賴永豐以活

桐城志

張寅字子畏桐城進士戶部主事歷郎中授江西九江府知府



調南昌修城垣建義倉增洪都書院膏火倡捐修築豐城江隄尋以原品休致桐城縣志

馬培章字星甫桐城副貢浙江青村場大使梟犯滕攀等為亂斬平之升知縣歷奉化蕭山去任後民間勒石有廉平不苛是真父母之頌著有晚晴詩鈔桐城縣志

張傳敬字慎修桐城人由供事官福建巡檢洊升知縣歷古田臺灣嘉義彰化並得民心任鳳山時會匪圍城傳敬激勵士民竭力防剿擊走之調辦臺灣善後卒桐城縣志

汪維城字省吾宿松舉人道光時官青陽訓導得士民心饑民求賑洵洵一言而解咸豐初元舉孝廉方正父憂去官胡林翼奏調湖北知縣署松滋潔己愛民有造士息訟闡幽表節築隄救災團練弭亂諸善政保同知直隸州卒祀松滋名宦祠著有

歷朝節義錄讀史危言味腴齋文集稼圃叢言經韻參考辨正宿松縣志

王璪字魯園懷甯人高祖以下五世同居璪事親以孝聞成道光壬辰進士官戶部二十餘年由主事洊升郎中有廉名咸豐四年授湖南寶慶知府署衡州知府禦粵逆靖甯民以教養為務告歸泣送者數千人璪長子希杰優貢懷遠訓導咸豐初襄辦饑賑勸捐團練同文生金照普武生常元確率勇援鳳陽與髮賊夾渦而軍擊斃百餘人累禦捻逆擊走之遷壽州學正士民送者數十里璪次子支蟠舉人直隸高陽知縣有政績懷甯縣志

金達字斗生桐城諸生議敘訓導軍功知府同治五年補湖北鄖陽捐賑水災修築城隍興復書院請增鄉試鄖字號中額一名士民稱頌之卒官桐城縣志



金承詔字蔭亭桐城人官直隸蘆台場大使以獲私販銅鐵出海人犯升知縣歷交河邯鄲及署磁州皆有聲憂歸起補河南夏邑調武陟時黃沁河漲隄危甚承詔資購石木親當險工救護以是獲安及粵逆竄懷慶倡募勇丁親督防剿洊升道員告歸桐城縣呈冊

重修安徽通志卷一百八十二

人物志

宦績五

徽州府

唐胡學婺源人父瞳以禦黃巢功授宣歙節度討擊使學成咸通進士仕撫州司戶上書忤田令孜竄福州尋授舒城令黃巢入京師說李克用等協力剿之每臨陣為前鋒後加宣歙節度討擊使封上柱國新安名族志  
南唐查文徽休甯人幼好學稍長任氣好俠歷官樞密副使閩王延政以建州建國稱殷元宗欲討之文徽請行乃以為江西安撫使攻建州傅其城遷撫州觀察使拜建州留後時李宏義挾吳越兵據福州劍州刺史陳誨將舟師擊敗其兵文徽以步



騎繼至宏義陽遣卒出迎而設伏以待文徽入其城被執送錢塘遣還為置酒遇毒歸金陵遂病瘖卒諡曰宣南唐書本傳

江煥歙州人仕南唐以直諫稱一統志

高拯字叔濟歙州人保泰閒知餘干縣喪亂後居民凋敝科役煩重拯為貸私錢若干萬緡每鄉責二人行商取息以資公用

民賴以蘇解任後民為立碑江西通志新增

宋魏羽字垂天婺源人少能屬文上書李煜署宏文館校書郎

時建當塗縣為雄遠軍以羽為判官宋師渡江羽以城降金陵

平入朝出知興州太平興國初知棣州改京兆府受詔詣瀛州

覈軍市租得隱漏數萬計歷度支戶部二判官召拜本曹郎中

條列利病二十事詔有司詳議皆以為便改鹽鐵判官歷任度

支使改鹽鐵使淳化四年併三部為一司以羽判三司出知滑

州後加給事中徙潭州真宗時以禮部侍郎卒羽涉獵史傳好

言事強力有吏幹歷劇職十年始踰四十鬚鬢盡白太宗極憐

之長子玠卒其妻自陳家貧無祿以次子校書郎瓘為奉禮郎

子浩為太子中舍孫平仲天禧三年同進士出身宋史陳恕傳

張諤字昌言歙州新安人南唐祕書丞通判鄂州宋師南伐與

州將許昌裔歸款授右贊善大夫選知閬州太平興國中除西

川轉運副使土人罕習舟楫諤建議置威權軍分隸管旬自是

無覆舟之患子秉字孟節舉進士儀狀豐麗屬辭敏速善書翰

太宗喜之擢置甲科解褐將作監丞通判宣州歷度支員外郎

知制誥判吏部銓知審官院後至禮部侍郎加樞密直學士復

知并州將行真宗為作五言詩賜之宋史張秉傳

許遜字景山祁門人父規嘗羈旅宣歙閒為舍旁生經紀喪事



負其骨並黃金寘死者家逃事南唐為監察御史宋師圍金陵  
統軍張雄以兵駐上江後主命逃召之雄即以師赴已而後主  
以蠟書止雄於溧陽逃曰此非柵兵之地乃戒雄曰慎無動待  
吾入白與公入城逃去雄果以出戰敗死國亡入宋官至司封

員外郎十國春秋本傳

王明字公明歙縣人希羽之孫也建隆中為鄆陵令五代時官  
吏貪污明矯其弊賅賂皆不受但令買薪芻積如邱山因築隄  
以備水患徽州府志

謝泌字宗源歙縣人太平興國五年進士端拱初為殿中丞獻  
所著文十篇古今類要三十卷召試中書以直史館賜緋時言  
事者眾詔閣門非涉僥望乃許受之言路稍壅泌抗疏陳其不  
可又言國家圖書多失次序請遵唐景龍中故事分集四庫遂

令直館分典四部以泌知集庫王禹偁請庶官候謁宰相須朝  
罷於政事堂樞密使預坐接見以杜私請詔從之泌上言是疑  
宰相以私也陛下以聰明寄於輔臣自非接下何以悉知外事  
太宗覽奏即追還前詔知福州代還民懷其愛刻石以紀去思  
歷位至太常少卿右諫議大夫判吏部銓卒錄其子衍為太常  
寺奉禮郎衍將作監主簿宋史本傳

洪湛字惟清昇州上元人新安志休甯人江甯籍曾祖勳南唐崇文館直

學士祖壽桐城令父慶元新喻令入宋為冤句令湛幼好學五  
歲能為詩未冠錄所著十卷為韶年集舉進士有聲雍熙二年  
廷試高等授右拾遺直史館端拱初通判壽許二州咸平二年  
復直史館使荆湖條奏利病甚眾時議城綏州使往按視湛言  
利有七而害有二凡五使西北議邊要真宗有意擢任曲宴苑



中賦詩深被褒賞初與王欽若知貢舉有任懿者納賄於欽若之妻登第後事發欽若方得君遂為所誣流儋州卒有集十卷子鼎大中祥符四年進士至度支員外郎直史館鹽鐵判官

宋史

孫逢吉婺源人太平興國七年知泉州以靖忠厚德見稱真德

秀舉與程大昌顏思魯林杓韓國華陳偁趙鼎並祀

一統志福建名宦

查道字湛然休甯人文徽之孫父元方仕南唐為建州觀察判官宋師平金陵盧絳據歙州傳檄至郡元方斬其使及絳擒太祖聞元方所為召拜殿中侍御史知泉州卒道幼沈疑罕言笑以詞業稱侍母以孝聞端拱初舉進士高第解褐館陶尉後寇準薦其才授著作佐郎至道中知果州招降賊黨何彥忠咸平中知甯州舉賢良方正拜左正言直史館大中祥符時預修冊

府元龜天禧初出知虢州上御龍圖閣餞之秋蝗災不候報出官廩賑民給麥四千斛為種所全活萬餘人卒真宗惜之詔其子奉禮郎循之乘傳往治喪事遷大理評事賦祿終制道性淳厚有犯不校所至務寬恕居京師家甚貧多聚親族之惇獨者祿賜所得散施隨盡有集二十卷從兄陶字大均初在南唐以明法登科入宋試律學除大理丞歷祕書少監判大理寺事知審刑院賜金紫子拱之洵化進士為都官郎中慶之太子中舍

宋史本傳

俞獻可字昌言歙縣人端拱初登第歷歸州軍事推官權領州事李順反川陝官吏多棄城獻可料州兵屯沿江為柵以遏之晉御史建言瑞物不在圖牒者毋得以聞提點廣西刑獄平定蠻寇為立互市築塞以阨其險累官龍圖閣待制

宋史俞獻可傳萬姓統



俞獻卿字諫臣獻可之弟舉進士補安豐縣尉有僧殺其師詣縣治言師出遊獻卿得其情縣稱神明調昭州軍事推官會宜州陳進亂象州守不任事獻卿往佐之初昭州積錢鉅萬獻卿平糴積穀數萬賴以饋軍改大理寺丞累遷三司鹽鐵判官上言天下穀帛日耗物價日高欲民力之不屈不可得也帝為罷無名之費以鉅萬計後知杭州暴風江潮溢決隄獻卿大發卒鑿西山作隄數十里民以為便以刑部侍郎致仕卒宋史本傳

許遜歙州人真宗時試汲尉二年汲人德之羣詣京師請遜為令遷校書郎知縣事一統志河南名宦

魏瓘字用之婺源人羽之子也以蔭補校書郎為開封府倉曹參軍與內侍督作燈山內侍誅索瓘以聞詔杖內侍於省中後

提點廣西刑獄邕州獠戶緣逋負沒婦女為傭者千餘人悉奏還其家就除轉運使以太常寺少卿知廣州築州城環五里儂智高入寇五十日城堅不能下論功遷工部侍郎五溪蠻叛除龍圖閣學士知荆南條三策招安為上不報後卒用其言招安之以吏部侍郎致仕卒贈太尉子十一人綸以才擢守吉州宋史本傳

姓統譜 萬

胡遇績溪人舉進士儂智高陷邕州孫沔余靖以謀略薦於朝除行營參謀從狄青大敗智高擢湖南江西安撫使江南通志

魏子浩婺源人以父羽恩授祕書省正字為吏強敏歷知壽澗滁安等州壽州盜殺寺童子有司執僧笞服子浩命脫械縱去一府爭為不可後數日得真盜富人犯法死獄中子浩曰是應死而自斃覬不可窮治爾其吏受賕而為之乎果如所料累官



司農卿知福廣等州又知江甯府致仕進衛尉卿卒宋史衛

汪穀字次元婺源人皇祐癸巳進士官泰興令沿江田為水所

鬻民苦虛賦穀力請於按災御史因得奏蠲遷廬州觀察判官

部使者欲中所怒郡守以危法穀爭之并被劾獄上刑部卒如

穀議孫愷紹聖丁丑進士知太平時有妖道以術惑眾忤者立

死愷立置之於法調岳州錄事參軍活平江死囚百餘人守怒

愷執法力爭守不能屈歷撫州全州所至稱神湖南通志

王汝舟字公濟婺源人皇祐進士熙甯中知舒城歲薦饑推行

荒政多所全活知南劍州捕盜官邀賞增入盜賊擬死者十三

人汝舟閱牘得其狀皆免死以治行第一聞哲宗時擢河北轉

運判官諫罷市珠之令徙夔州提點刑獄告歸先守南劍時祖

母沒上言諸父無在者乞以適孫解官終三年喪詔從之著為

令有雲溪文集萬姓統譜

孫抗字叔和黟縣人少孤力學為文操筆數千百言始同學究

出身後登進士甲科知潯州擢監察御史劾奏狄青不當沮敗

永洛城事又言日食陰盛當以後宮為戒又諫止大獵遷都官

員外郎提點江西刑獄有言歲凶當稍貴常平粟價以利糴本

者抗言此非常平本意官至工部郎中子適邈邈适遇適從王

安石遊年十四議論著書已驚人登第後為永州軍事推官邈

為縣令安石亦稱其好學邈及孫略皆登進士第萬姓統譜

汪汲字子遷績溪人年二十登嘉祐進士第授慈溪令濬河溉

田數千頃民祠祀之擢太平州推官鞫贊善大夫陳知規獄方

暑繫者百餘汲訊得其情解釋澣浴知規復官繫者出為佛齋

以報子弈字公偉與弟襄相繼登第友愛甚篤為東流令有書



生以妄言繫獄憲司欲置極典奔以為狂疾奏上果貸死襄字公弼仕南陵主簿太守翟汝文遺書朝士言不喜為宣州守而喜識汪主簿始襄少游太學有詔擇內生教諸小內侍大司成汪澥以襄名聞時梁師臣為提領頗敬禮襄及登第師成欲薦為館職襄不肯就師成知其有嫌遠意怒之奔子安世襄子安行皆登第安世官吉州永豐簿南畿志 萬姓統譜 江南舊通志洪中孚字思誠湛之孫也元豐進士尉黃岡平鄰盜張韜為成都縣主簿鵬門蠻叛蜀帥以屬中孚即親呼酋長諭以禍福令自歸服人以為膽大於身崇甯初轉運熙河興鼓鑄榷酤市易之利以給邊立墩堡給鎧仗興耕屯以防剽掠青塘內附孚夜半抵其地撫慰之酋皆畏服知太原府夏人提重兵來議地界飭諸將掩擊遂去以龍圖閣待制致仕萬姓統譜 江南通志

王愈字原道婺源人紹聖登第初宰建昌立法賑濟活飢民數萬人知信州睦寇犯信擊敗之為王黼所嫉坐竄逐高宗時呂頤浩首薦之起知無為軍江南通志

胡汲字彥思婺源人父紹以進士為剡簿分檢旱災民得實惠汲登紹聖四年進士為深州通判廡有蔬圃一千六百餘畦歲得錢踰二百萬汲以圃送公使者以事聞有詔嘉獎江南舊通志

程邁字進道黟縣人元符庚辰進士高宗時歷知福州温州上稱其政光前絕後今之吏師又知平江鎮江鄱陽歲饑多盜以邁知饒州奏蠲舟車征算增米價以招商賈米大至手條寬恤三十餘事民以蘇息進顯謨閣直學士因使過其鄉民有訟田者二十年不決邁閱其牘問訟者年幾何曰六十六曰爾齋券乃某年時方七歲安得云以妻財置田訟者乃服萬姓統譜 江南通志



汪叔詹字致道黟縣人少敏於文崇甯進士累官太常博士以直言忤王黼斥歸久之權知蕪湖縣發運盧宗原議涸丹陽湖爲田叔詹爭之不得置印廳事走京師上書言湖不可涸狀帝悟從之擢提舉潼川常平時東川鹽井鹵竭民多虧課被囚奏蠲其逋且削煮鹽之籍尋知鄂州轉河南憲使有惠愛後以司農少卿總領湖廣六路財賦八年無闕事萬姓統譜江南通志汪希旦字周佐歙縣人大觀進士知泗州時劇賊宋江橫行及濠濠泗密邇希旦嚴守備賊不敢犯上嘉之轉朝奉郎直祕閣會旱蝗開倉賑濟蝗不入境麥生兩穗治最賜三品服歷知袁江舒三州以朝請大夫致仕萬姓統譜江南舊通志黃葆光字元暉黟縣人以從使高麗得官試吏部銓第一賜進士出身由齊州司理參軍歷監察御史左司諫言三省吏猥多

如遷補升轉奉入賞勞之類非元豐舊制者其大弊有十請一切革去徽宗卽命釐正士論翕然蔡京怒其異己密白帝徙爲符寶郎帝思其忠明年復爲侍御史遼人李良嗣來歸上平遼書葆光論其五不可政和末歲旱葆光上疏言陛下德足動天恩足感人而太師蔡京侈泰過制太宰鄭居中少宰余深依違畏避此天氣下而地不應如此疏入不報京中以他事安置昭州京致仕起爲職方員外郎改知處州處州當方臘殘破之後盡心牧養民列上其狀加直祕閣再任卒州人祀之宋史本傳胡舜陟字汝明績溪人大觀己丑進士再爲監察御史欽宗卽位奏誅趙良嗣高宗立出知廬州修城治戰具冀州雲騎卒孫琪聚兵爲盜號一海蝦至廬邀資糧舜陟出兵擊其抄掠者琪宵避伏兵邀擊得其輜重招降舒州賊濟南僧劉文舜卽使文



舜破盜丁進李勝於蘄壽間又伏兵擊敗盜張遇於梁縣擢徽

猷閣待制充淮西制置使淮南八郡羣盜攻蹂無全城舜陟守

廬二年安堵如故知建康府充沿江都制置使改知臨安府充

京畿數路宣撫使後知靜江府罷官復起為廣西經略為秦檜

所惡因呂源誣其受金盜馬遣勘官偏之至死舜陟有惠愛邦

人為之哭妻江氏訴於朝事得白宋史本傳

孫義叟徽州人政和初由徽猷閣直學士帥瀘州築城有功徽

宗賜書獎諭之四川通志新增

胡汝明字傳道黟縣人政和辛卯進士建炎中歷官殿中侍御

史建言經營太學作新人才以備中興官使又乞罷州郡添差

酒稅多見採納出知饒州致仕江南舊志

金安節字彥亨休甯人宣和甲辰進士歷遷侍御史秦檜兄梓

知台州安節劾其附麗梁師成梓遂罷檜銜之丁母憂遂不出

檜死起知嚴州歷遷侍講給事中金亮死陳進取招納備守三

策而以備守為進取招納之本龍大淵曾覲並除知閣門事安

節屢爭之上怒即自劾乞竄上意解命遂寢李珂擢編修官安

節又論罷之上諭之曰朕知卿孤立無黨張浚聞之曰金給事

真鐵石人也後權吏部尚書兼侍讀力請謝事以敷文閣學士

致仕卒累贈開府儀同三司少保宋史本傳

汪若海字東叟歙縣人少遊太學靖康初下詔求知兵者若海

應詔擢高等金人犯京師若海請河北國家重地當用之以攬

天下之權不可怯懦自守坐受其敝康王起兵相州乃上書請

立王為大元帥鎮撫河北欽宗用為參謀遣如康王所宰相何

桌執異議不果高宗即位遷江南經制使上言天下者常山蛇



重刊安微通志 卷之二十三  
勢也秦蜀爲首東南爲尾中原爲脊今以東南爲首安能起天  
下之脊哉遂以張浚宣撫川陝會以論軍食忤執政謫英州道  
出臨川時節制江夏軍馬李允文跋扈不用朝命若海馳諭之  
允文感悟惟其下曹成有他志將殺若海若海夜宿王林軍帳  
以計得林軍印奪成眾五千人成遂遷湖湘旣安以前功通判  
順昌府爲劉錡請援師於朝大破金人累遷直祕閣知江州丁  
父憂時方經略中原議起若海而若海已卒宋史本傳  
汪臯會字元贊黟縣人紹興壬子進士爲建昌軍教官創建學  
宮留意教養遷醴陵宰邑遭寇旱民逃土荒撫以惠愛治以最  
稱人稱醴陵先生湖南通志  
汪勃舊作勃據史改字彥及黟縣人紹興壬子進士調嚴州建德簿長  
於吏治入歷諫議大夫遷御史中丞十七年除簽書樞密院事

十八年兼權參知政事封新安郡侯八月罷復起知湖州爲政  
安靜不尙鞭扑民間鐫木曰賢哲太守宋史高宗紀江南通志  
汪若容字正夫歙縣人紹興乙卯進士官永興簿茶商確磨妨  
民田爲治其魁大均水利後知洪州召赴行省陞對千言切中  
時病弟若思字行夫紹興壬戌進士歷實錄院檢討官奏對帝  
以爲深得愛君之義遷祕書丞徽州府志  
程叔達字元誠黟縣人紹興壬戌進士爲湖州教授金亮背盟  
袖書見時宰言五事歷遷監察御史賑兩浙饑以勞被獎除右  
正言淳熙初奏敬天愛民有志事功三事以顯謨閣待制致仕  
慶元中特除華文閣直學士卒諡壯節江南通志  
韓邦光歙州人紹興閒官安福令軫民疾苦興利剔弊王瀘溪  
暨太守王洋皆稱其廉江西通志新増



朱安國字康侯休甯人紹興辛未進士累官至監察御史嘗條奏出六年未決之囚出知廣州劇盜陳青寇海道選委牙校李寶授之方略遂縛青以歸威震一方子拂宰姚江築捍海隄五千丈

江南通志

李知己字智仲婺源人紹興甲戌進士通判婺州有滯獄數百一經予奪無復興詞州給秋衣軍士以絹輕持杖誼譁知己呼其首勅以軍法仍計絹直以給軍情悅服歷遷大宗正丞兼權都官郎

江南通志

汪杞字南美歙縣人建炎二年進士紹興閒崇安丞縣庫陷失緡錢踰數千聲色不少動但責庫吏限一月輸時郡守魏在欲逮置獄杞曰積弊至此顧聽其所為不效則置獄未晚既限滿果盡得之有兄弟五人爭產累任不能決杞列之廷下舉唐賢

韓忠彥飲乳事訓之皆感泣均其產去課民藝桑柘十六萬株後皆食其利監司論薦遷知安仁縣

福建通志新編

汪安行字伯壽績溪人紹興甲戌進士權知澧州請罷公使庫孝宗顧宰相王涯曰此朴直道家老子政事如何涯對曰舊攝澧州民有去思卽命復守澧官至朝奉大夫

江南通志

祝華字繼張婺源人紹興甲戌進士知衡陽縣當路舉其政績曰有實政無貪風後歷守象州梧州改知南劍州未任卒

徽州府志

方有開字公明歙縣人隆興癸未進士為國子錄歲饑入對論切時弊孝宗嘉之遷司農丞獻屯田大計知和州除轉運判官兼廬帥措置營屯人服其能有奏議五卷屯田詳議三卷

徽州府志

吳天驥字伯駿休甯人隆興癸未進士調建昌司戶能折疑獄知信州歲大饑首修荒政發廩賑糶日至萬六千人蠲減宿逋



遷戶部員外郎卒

江南通志

朱晞顏字子淵休甯人隆興甲申進士授富陽尉捕方湖北沌河盜平之知永平縣苗獠悅服民為立祠除知靖州奏言襄漢通吳蜀宜移武昌大軍戍襄陽留水軍以控鄂沔改知吉州奏言蜀之邊患不在南而在北宜移成都制置使於興元與荆鄂相應擢廣西運判講究鹽筴上便宜數千言革客鈔科抑之患後又為廣西安撫浚靈渠通馬市南地卑濡城苦不能久乃創新意為城屋數千閒覆之官終工部侍郎兼知臨安府

江南通志

夏尙忠字信卿休甯人乾道丙戌進士知泰州海賊時發民懼其害尚忠率兵平之海道肅清後徙著作郎致仕

徽州府志

汪彥端字允之黟縣人乾道己丑廷對第三人歷知秀州有勢戶占田數千畝不輸賦彥端責其輸而以田歸之民

浙江通志

汪泳字伯游休甯人乾道己丑進士淳熙中知蒲圻縣政聲藉甚上言王者仁政必自均力役始上嘉納之遷大理丞臨安有獄不決者輒繳送棘廷泳言如此則天獄反為京府一院乞下臨安無得繳送從之後歷知泰州湖州以中奉大夫致仕

一統志湖

北名宦

汪必達字兼善黟縣人與弟必進同登淳熙乙未進士必達知旌德縣有父訟其子者必達謂父子至恩忍以私庭言語聞官乎授父以杖令自笞之發廩賑饑全活甚眾必進宰建平有聲著有邑政論

江南舊志通志

吳發字伯韜歙縣人淳熙乙未進士為臨川法曹掾多所平反遷龍泉丞往慶元慮囚狴犴充斥發或罪或釋應時決遣歡聲

載道

江南通志



吳箕字嗣之休甯人為當塗令剖析民訟編類成書名聽辭類

稿南畿志 舊志太平府名宦 新移

程卓字從元休甯人淳熙甲辰冠南宮別院廷對首乙科授揚州司戶參軍歷知崇仁龍泉屢有異政入為大理寺丞遷刑部員外郎嘉定中充賀金國正旦使歸奏敵人陵弱請固邦本修戎備以待復仇除軍器監權太府少卿出知泉州請減上供銀數又請敕廣南通行會子以流通境內楮幣民旅利之為立祠除福州帥嚴察吏蠹稅清訟息遷同知樞密院事一時政要多所規切卒諡正惠初休甯賦以卓請得蠲減鄉人祀之宋史甯宗紀

江南舊志

汪文振字子泉休甯人淳熙甲辰進士為長林令鋤治豪猾知台州公帑纖芥不入私門歷司農少卿提點浙江刑獄旱蝗民

饑縣督逋監錮文振錄囚至華亭釋四百餘人他縣亦如之民

賴以全活者眾江南通志

黃何字景蕭休甯人知興國大冶縣湖中三山產鐵盜鑄者數千人有密聞之朝者調軍且至何止軍境上單騎往諭皆感泣遜散悉焚其具一境晏如延朱子弟子萬人傑為學者師俾知

趨嚮歷知處州岳陽終朝議大夫一統志湖北名宦

汪義和字謙之黟縣人淳熙辛丑進士知新建縣歲旱白帥府曰旱甚已批放八分矣帥初怒其專後竟從之守武岡崇學校增科舉以變武健之習入為太常博士兼禮部郎中樞密院檢詳館伴正旦使時慈福几筵未撤金使以樂請義和以理折之使慚而止官至侍御史兼侍講卒江南通志

吳格字子平休甯人淳熙丁未進士判光州提舉浙西常平茶



鹽歲旱蝗令民雜藝不種之田以自食官不收苗主不收租遷

帥紹興請免定科淨財物力等錢官終起居舍人

江南通志

朱權字聖與休甯人淳熙丁未進士歷知惠州郡蝗禱於神忽大雨水漲有鷹隼鳥雀驅蝗赴水死廣東有寇劫掠遣將授以方略生擒其魁特加一秩以老乞休

江南通志

汪綱字仲舉黟縣人義和之子也以蔭入官調桂陽軍平陽令桂陽歲貢銀二萬九千餘兩而平陽當其三之二歲久銀鑛已竭力請蠲減歲饑傍邑惡少入境爲患親往諭之杖其首惡八人發粟賑糶民賴以安遷知高郵軍陳揚楚二州備邊屯守之要修築范仲淹所築興化海堰置石礎函管以疏運河水勢提舉淮東常平獻兩淮便宜軍國大計淮東煮鹽之利半天下歲久滋弊帑藏空虛綱抉摘隱伏得贏金三十萬緡爲椿辦庫以

備闕乏進直煥文閣知紹興府開浚蕭山古運河八千餘丈復

創開江口以通舟車發巨室埠圍以資灌溉之利儲錢三萬專

備修築自是海田始固理宗卽位召爲右文殿修撰加寶謨閣

待制奏免越經總制虛額錢九萬五千緡權戶部侍郎致仕卒

贈宣奉大夫

宋史本傳

張震字彥亨婺源人知蕪湖縣秋稅米六萬石故加耗十之六問之邑吏皆曰官吏月俸綱運折閱仰給此耳震愴然卽減其半知湖州踰年公私兼足乃捐府帑十七萬緡代民輸丁錢一年罷四安鎮商稅置酒坊以補課額終朝奉大夫

徽州府志

程渭老字少呂黟縣人爲蘄春簿奉檄鞫龍舒管承議之獄管行賂於道正色叱之竟論如法轉建德令歲荒躬履田畝申明

蠲放民得實惠

徽州府志



朱況字伯荀休甯人慶元丙辰進士為德安府錄參歲饑漕使吳柔勝屬意荒政悉以委況況擇僧廬分設糜粥全活甚眾金人擾邊大使趙方檄況備禦有功改知甌甯時財計窘乏况措置有方足國利民為八縣最

福建通志  
徽州府志

趙善璋字德純歙縣人以宗室登嘉定戊辰第又中明法科除

大理評事通判廣德軍歲饑借倉司米斛錢數千緡為糴本民

賴之改知江州米價騰踴轉於諸路糴米三萬餘斛分給諸邑

米價大減帝嘉其績召為尚書郎官至中奉大夫

江南通志

金文剛字子潛休甯人知奉新縣金人擾淮流民入境為亂文

剛籍其姓名為經畫其衣食從容遣歸擢判興德監左藏及封

樁庫奏核籍革宿蠹文剛故師真德秀言動一以德秀為準倣

范仲淹法置祭田立義莊俾子孫世守之

徽州府志

呂午字伯可歙縣人嘉定辛未進士歷任兼沿海制置司事時海寇未平午廉知調軍出海之弊議糧盡再給不許擅還賊舟所有悉以給軍海道遂清擢監察御史與史嵩之忤遷宗正少卿出知泉州需次凡七年理宗特再除監察御史兼崇政殿說書嵩之陰擠之遂力求去帝慰畱甚切乃復入臺愈敢言無所

忌以憂歸卒贈華文閣學士通奉大夫

宋史本傳

吳輔字友仁休甯人嘉定庚辰進士授崇安簿汀邵寇作督餉

賑饑真德秀極器之主管兩浙運司幕職號霹靂手後除御史

兼崇政殿說書首列四疏奏之帝輒嘉納

江南通志

汪勳字鼎叔黟縣人嘉定登第調淳安尉邑遭水患亟命舟救

溺全者無算授廣西檢法兼提幹北銀綱羨餘悉歸公帑改辰

溪時帥以辰溪遠雜諸獠欲移之勳謂臣子之職不當趨易避



難單車至邑諸獠帖服卒於官江南通志

程元鳳字申甫歙縣人紹定己丑進士歷宗學博士輪對稱旨  
出知饒州進江淮荆浙福建廣南都大提典阮治芝生治所眾  
以為治行之致元鳳曰五穀熟則民蒙惠此不足道也召為右  
曹郎官疏言八事拜監察御史兼崇政殿說書臺官潘觀吳燧  
以論鄭清之被出元鳳爭之得召還寶祐元年除侍御史疏言  
法孝宗八事薦知名士二十餘人累遷參知政事進拜右丞相  
封新安郡公丁大全預政元鳳屢疏乞解機務乃除觀文殿大  
學士與祠開慶兵興上疏收人心重賞罰團結民兵數事起判  
平江府兼淮浙發運使度宗即位進少保三年拜少傅右丞相  
兼樞密使進封吉國公致仕卒贈少師諡文清宋史本傳  
方岳字巨山祁門人紹定時以甲科調南康及滁州教授除淮

東安撫司幹官高郵軍閔以制命往戮首惡數人一城帖然史  
嵩之在鄂渚主和議北使王楫有割江之請岳嘗代趙葵書稿  
責嵩之嵩之嗾言者論之閒居四年淳祐六年遷宗學博士差  
知南康軍以忤京湖閫賈似道調知邵武軍未至峒寇作馳榜  
諭之寇知岳威名迎拜車下而散改知饒州知甯國軍皆未上  
而罷起知袁州新其城其後廣寇入而袁不陷岳力也官終朝  
散大夫一統志江南通志

汪應元字尹卿歙縣人紹定壬辰進士調潭州司戶參軍奉檄  
道經綏甯會猺洞嘯聚挺身往諭皆感服降散累遷大理評事  
出知建平縣有死囚送郡道逸自造庭下曰公明理盡情願歸  
死朝廷聞而異之累升直祕閣終兩浙東路提點刑獄公事兼  
本路勸農提舉河渠公事卒於官江南通志



呂沆字叔朝午之子也端平丙申銓試第一知於潛縣重囚逸者聞沆至自歸通判婺州朱君章訟田四十二年吳王府爭墓田二十九年沆皆決之賈似道議行公田沆以彗星見請罷之理宗崩似道矯詔廢十七界會子行關子沆力言非便似道怒調將作監簿尋論罷之三學伏闕訟沆屈召赴行在不復出卒年八十一

宋史呂午傳

胡崇字宗叟黟縣人與兄嵩同登淳祐甲辰第授句容簿制置使吳潛辟入閫幕委行經界法於溧陽不履畝而民皆依限自實歷官太常寺丞上疏言公田之非忤時相出知台州台為似道鄉郡一以公正行之天台仙居水暴漲請捐米數十萬斛以賑饑民阨於似道不得請遂乞免得祠

江南通志

言帝王致壽之道在修德後世怵邪說以求之往轍可鑒修德之目有三曰清心曰寡慾曰崇儉皆致壽之原上嘉納之

宋史度宗

紀江南舊通志

程鳴鳳字朝陽祁門人寶祐元年射策第一歷知德慶府將之官適部內山獠猖獗或止其行鳴鳳正色曰此正臣子奮志之日也至則條上事宜於帥出奇掩擊賊黨悉平知南雄州進無逸說有讀史發微三十卷

江南通志

程崇歛縣人淳祐進士歷大理寺丞出守台州抑絕權豪甚有政聲先是府治後山妖狐變幻崇至潛伏不見

浙江通志新編

許孔明字元熙祁門人入太學值理宗幸太乙宮伏闕上書諫遊幸且言賢否混淆宰相丁大全變理失道帝嘉納之寶祐丙辰登進士仕宣教郎

江南通志



陳慶勉休甯人淳祐中知蒲圻縣湖北漕使蕭逢辰舉之曰性資純恪學問老成一統志湖北各宦

江潤身字從德婺源人咸淳初官合肥主簿清廉剛決讞獄尤

矜恕多所平反南畿志州府名宦舊志廬新移

元邱龍友歙縣人宋亡之二年李世達等兵起萬戶李木魯敬

下令屠休歙等邑龍友時得郡印率父老詣軍門以獻言亂者

非百姓意乞全活之以廣弔伐之仁萬戶許之遂承制以龍友

知徽州婺源汪元龍佐之歙鄭安知歙休甯陳宜孫知休甯休

甯趙象元程隆佐之元龍弟元圭知婺源祁門方貢孫知祁門

程克柔佐之於是止戮倡亂數人一方賴以完全金伯明為作

九賢詠以美之新安文獻志

洪椿字子壽歙縣人至元中為仙居簿邑民李念二為亂省遣

萬戶提重兵至脅官吏手狀誣闔邑為賊將屠之椿曰盜止一

鄉餘民何罪以死爭得免歷官至承務郎江南通志

程願學字希聖休甯人以薦入書局修職方氏書除長樂令民

有死非命者其妻訴不願理呵曰此即殺人賊也一訊即服羅

江五峽諸獠時出殺掠入長樂境願學邀之於道縛其渠魁七

人集吏民分守要隘獠不敢入一統志廣東各宦

吳安朝字元鎮歙縣人登宋咸淳進士歸元授池州路總管府

判官知賀州門無私謁州政肅然時桑哥柄政安朝曰志不我

遂矣棄官歸江南舊通志



重修安徽通志卷一百八十三  
人物志  
宦績六  
徽州府  
明葉保翁字宗茂休甯人至正壬辰蕪黃盜起與汪同起兵禦  
寇鄧愈克徽州授以婺源州守修城積糧招撫流離升饒州知  
府為守將所誣謫居濡須子仁上書請代父罪帝嘉其孝釋之  
朱模字子範休甯人洪武初判六安州在任清正左氏軍丁倡  
亂單騎捕之深入賊壘遇害  
鮑頴字尚綱歙縣人洪武初以薦入尚賓館纂修元史歷翰林  
院修撰同知制誥出為耀州同知撫流亡興廢壞張氏餘黨許

重修安徽通志卷一百八十三

人物志

宦績六

徽州府

明葉保翁字宗茂休甯人至正壬辰蕪黃盜起與汪同起兵禦  
寇鄧愈克徽州授以婺源州守修城積糧招撫流離升饒州知  
府為守將所誣謫居濡須子仁上書請代父罪帝嘉其孝釋之

江南通志

朱模字子範休甯人洪武初判六安州在任清正左氏軍丁倡

亂單騎捕之深入賊壘遇害

鮑頴字尚綱歙縣人洪武初以薦入尚賓館纂修元史歷翰林

院修撰同知制誥出為耀州同知撫流亡興廢壞張氏餘黨許



王為害頗擒之又嘗覈田減虛糧五千石徽州府志

方光昭字順存婺源人洪武壬戌舉聰明正直授甯都縣大使

梅花洞寇發出奇捕平之徽州府志

查允中休甯人洪武間知雩都縣時流賊犯境征南將軍帥師

討之應給軍需民不告擾及賊平撫綏黎庶奏蠲糧額至今民

思慕之江西通志 新增

王正字季立婺源人洪武時以貢授給事中出知東阿縣持身

廉潔涖政公平秩滿當遷百姓詣闕留之改鄆城二邑感之如

父母山東通志

唐子儀歙縣人以文學徵知興國縣教民務農造士日有程課

劇賊為亂往捕之忽暴風雨來子儀曰此賊徵也陣而待賊至

悉就擒秩滿入朝永樂簡為趙王府紀善時王方坐嫌疑賴子

儀左右之得免一統志 江西名 徽州府志

程繩祖字叔武休甯人洪武時舉經明行修除御史左遷湖口

令邑東黃麻潭田為蛟所陷五百餘畝民輸虛稅繩祖齋沐禱

於城隍白日雷擊蛟斃奏豁田賦民祠祀之萬姓統譜 江南舊通志

汪灌休甯人洪武時知雲夢縣創學勸農民久而思慕之一統志 湖

北名

程濟績溪人建文時官編修精邵子先天之學靖難兵入帝落

髮從水關出濟易服為道人隨帝至滇未幾遍遊蜀粵吳楚而

往來嘗住武定獅山濟委曲翼衛歷四十載供給使令聽順無

忤嘗奉命述從亡傳藏之山巖名從亡隨筆正統間從帝還京

入大內乃歎曰今日方終臣職矣復還滇焚菴散徒今獅山有

建文祠與像竝祀從亡諸公雲南通志 新增



正谷器徽州人洪武閒蕭山知縣涖政明敏長於治才果決如

流事無壅滯一統志 浙江 新增

唐吉祥字彥正歙縣人建文庚辰進士知祁陽縣以一僕自隨

將親弟自家來迎問之曰而兄行李止此矣考績為天下最改

葉及南陽皆有聲擢工部主事楚紀 湖南通志

金輝休甯人永樂癸未進士任臨江推官遇事敏給涖政詳明

晉御史以風節著稱江南舊志

黃汝濟字巨卿祁門舉人為攸縣教諭授諸生以春秋因材造

就文教勃興湖南通志

李厚字執中祁門人以貢授刑部主事時密察民俗甚嚴有老

婦與童孫戲曰孫毆祖母偵者以告遂坐孫獄厚以童穉無知

請釋不許明日帝以飭試童曰能識左右何謂無知謫厚安南

掾厚即日行曰吾豈敢附會死獄以媚上耶後帝感悟召為吏

部主事江南舊志

胡壽安字克仁黟縣舉人知信陽縣事以艱去作詩告城隍云

神若有靈應識我去時還似到時貧起知新繁延父老詢邑中

利病而罷行之躬行田野勸民耕種性淡泊寢處一紙帳後園

種蘆菔數畝以供賓客三宰大邑未嘗攜妻子考績赴京民泣

送者數千一統志 四川名宦 萬姓統譜

俞士真婺源人永樂甲申進士知芮城縣先官郎中風采大著

及涖芮城能以古循良治撫綏小弱均賦役修學校興舉悉中

人情而規為措置百度具飭祀名宦山西通志

胡永興字彥隆祁門人弱冠召入文淵閣纂修高廟實錄登永

樂戊戌進士知三河縣奏減民賦擢趙王府左長史高煦謀不



重修安海通志 卷一百一十三  
軌密使通趙永興泣諫王感悔高煦既擒勸王獻護衛上表謝  
言者乃息江南通志

胡彥祥歙縣人永樂中知眉州重農事興學宮修墓頤堰以廣  
水利一統志四  
川名宦

汪善字存初歙縣人永樂丙戌進士授吏科給事中彈劾不避  
權貴出知夷陵州州多虎患善虔禱峽神旬日中虎自死遷永  
州府同知一統志

陳宗源祁門人永樂閒福建建陽縣典史處事公平九年如一  
日秩滿當遷邑民懇畱事聞升本縣知縣福建通志  
新增

方勉字懋德歙縣人永樂乙未進士改庶吉士正統初授行在  
監察御史劾都御史李議巡五軍教場覈奏鎮遠侯顧興祖彈  
工部尚書吳中所舉非人出按江浙回力言浙江急務莫切於

防倭而防海都指揮張翥年老且貪不堪備禦升湖廣僉事歷  
右參議天順初致仕一統志

王靜字永靜黟縣人以貢授御史時值營造奉命巡工南北又  
往西域市馬陟雪山崑崙抵弱水徧歷七十二族升漢陽知府  
有盜十二人待決靜廉得無辜論脫五人江南通志

高溥歙縣人永樂中知萬縣愷悌愛民有古循吏風四川通志  
新增

王俊德字大本歙縣人永樂乙未進士授御史按河北嘗除虎  
患巡浙東有大豪訟搆無辜數十人廉得其由置豪於法歷升  
廣東左布政卒於官江南通志

方直祁門人洪熙時為永明教諭建立兩齋號舍振興文教湖南通志  
莊觀字居正歙縣人永樂閒舉人分教浙之義烏滿考優等升



辰溪教諭擢國子學正造士有方正統閒以大司馬王驥薦擢陝西提學僉事秩滿升副使仍董學校景泰初奉表赴京乞歸

一統志

朱原貞字季常婺源人永樂閒任廣信同知政事文學眾所推許修學宮勸士崇儒民懷其德後卒官郡人無少長皆為流涕

明統志 江西通志 新增

楊甯字彥謐歙縣人宣德庚戌進士授刑部主事正統中從都督吳亮征麓川賊約降甯曰兵未加而降誘我也弗聽敗績諸將獲罪甯擢郎中復從王驥至騰衝破賊有功超拜刑部右侍郎參贊雲南軍務時麓川甫平甯以騰衝要害與都督沐昂築城置衛邊方遂定閩浙盜起命鎮江西賊至輒擊敗之景泰初召拜禮部尚書

明史本傳

吳甯字永青歙縣人宣德庚戌進士授兵部主事正統中再遷職方郎中郟王監國于謙薦擢本部右侍郎謙禦寇城外甯赴軍中議方略比還城門弗啟寇騎充斥立雨中指揮移時乃入寇退畿民猶日數驚甯奏告捷四方人心乃定景泰改元遂乞歸不復出甯有識鑑嘗為于謙擇壻得千戶朱驥謙疑之甯曰公他日當得其力及謙遇害驥果歸其喪葬之

明史于謙傳

馮靖字寓安績溪舉人歷官御史陝西罕東等番以易茶馬而譁靖往宣諭夷民咸服聞寇鄧茂七既平其黨吳金七等據政和稱號承命經理設奇擒獲械送京師升浙江按察司僉事晉副使乞歸

萬姓統譜

程富字好禮歙縣舉人特拜御史江西民饑多盜命富往巡盡發倉儲以賑大盤山妖賊勢甚熾檄指揮吳堅討之而躬率兵



為之聲援既抵賊境堅猶未至賊布妖霧以迷軍富下令蓄銳

以待霧盡賊至四面擊之破其巢會堅兵亦至遂盡俘其黨捷

聞升大理少卿奏罷造紙鑄錢二局免官木二百四十餘萬調

右僉都御史令往甘肅參贊軍務敷陳五事邊郵賴之官至右

副都御史江南通志

施泰亨字守正休甯人宣德時判泰安州多善政既去任民詣

闕請畱命為本州知州以艱去服除民復詣闕請復任遂再知

泰安州景泰初致仕山東通志

汪敬字益謙婺源人宣德癸丑進士詔往湖廣纂修宣廟實錄

事竣乞養歸起授戶部主事以廉能著景泰閒徽州知府孫遇

以該徵稅糧本邑繁重疏乞折納輕贖事下戶部敬力為贊成

一郡德之萬姓統譜 江南舊通志

汪瀚字以淵祁門舉人授福州府通判時有海寇統督民兵捕

獲甚眾歷處州府同知徽州府志

程復初字明善婺源人以貢授嘉興府檢校倭寇至海鹽奉檄

備禦邑賴以安藩臬嘉其能委之督運挽輸如期而民不擾徽州府志

江浩字敬夫歙縣舉人知廣昌縣鄧茂七侵掠縣境浩禦之賊

不能犯以功升本府通判歷兩浙都轉鹽運使廣昌祠祀之萬姓統譜

程公遠休甯人正統閒官福清典史捐俸造古屯橋民不病涉

羣不逞乘沙尤亂白晝搶掠多方捕緝桴鼓無警福建通志

程信字彥實休甯人正統壬戌進士授吏科給事中也先犯京

師督軍守西城都督孫鏜戰失利欲入城信不納從城上發礮



助之寇遂卻景泰改元以天變上中興固本十事首請帝敦孝友之實以答天心出為山東右參政督餉遼東巡撫寇深奏盜糧一石以上者死又置新斛視舊加大屬信鉤考信立碎之曰柰何納人於死深不說天順元年錄景泰間進言者擢太僕卿改左僉都御史巡撫遼東以事為門達寇深所中謫南太僕少卿尋召為刑部右侍郎以艱歸起兵部四川戎縣山都掌蠻作亂進尚書節制諸師進討平之分其地設官控制兼大理寺卿致仕卒贈太子少保諡襄毅明史本傳

許仕達字廷佐歙縣人正統乙丑進士授御史景泰元年上疏言災沴數見請帝痛自修省復請於經筵之餘日延儒臣講論經史帝褒答之出按福建劾中官廖秀貪暴秀訐仕達下鎮守侍御薛希連廉問會仕達亦劾希連貪縱乃命曹凱王豪往勘

還奏互有虛實而耆老爭詣闕請畱仕達乃命畱任期滿當代耆民又詣闕請畱不許歷山東左右布政使卒於官明史曹凱傳

程昊字希大婺源人正統戊辰進士授御史巡按浙江數奏劾不法閩賊葉宗府志作仁八攻掠浙地以計擒斬之卒於官命有司

致祭歸其柩萬姓統譜

朱永甯字孟康歙縣人正統戊辰進士擢御史出按河閒時聞北警官吏多逃去永甯糾眾登陴守禦七晝夜髮為之白擢命

方下而卒民為罷市立祠徽州府志

汪回顯字汝光祁門人正統戊辰進士授戶部主事景泰初奉使見河南民饑奏發粟十餘萬石賑之民立生祠以祀使蜀覈

鹽井減其久湮增其新開奏除冗課十餘萬歷知廣惠二府江南通志



汪榮歛縣人正統閒知建甯縣時當沙寇殘燬民流離或有從賊者多方撫諭悉令復業同郡黃瑞為秦甯主簿嘗據險立砦以禦沙寇闔境晏然福建通志

莊歛字尚源歛縣人景泰辛未進士授御史按浙江山東廣東福建奏免徵輸禁竊礦平賊寇止採珠按察雲南因其土俗以折獄訟政化大行官至河南右布政江南通志

洪寬字有約歛縣舉人知桂陽州時洞獠剽掠民廬煨燼寬請遷州治於古府舊基民賴以安改知鄭州時創藩封濬漕河立會府工役浩繁寬極言州狹民貧得免其半歲饑奏免稅三分請發陳麥萬石與官粟兼濟上臺善之下其事旁郡全活甚眾湖南通志

程泰字用元祁門人景泰甲戌進士授戶部主事犒師陝西郤

總帥餽歷郎中遼東用兵遣泰治軍實尋遣視山東災比還條陳四事多見施行擢廣西參政往定安南地界歷任河南左布

政萬姓統譜唐嵩字處謙績溪人任慈利訓導署縣事庶政具舉茅岡等峒土兵剽掠嵩擒治之新令至尋以艱去九溪軍民其實保任格於例不行徽州府志

康永韶字用和祁門人父汝芳正統丙辰進士由兵部主事改工部治水河南免夫役三萬升辰州知府永韶以舉人擢御史成化初巡按畿輔劾尚書馬昂抑市民地爭慈懿太后山陵伏哭文華門竟得如禮彗星見復偕同官上時政八事後以劾大臣考察有私下詔獄謫知順昌福清縣以知天文召還授欽天

監正擢禮部右侍郎致仕明史魏元傳



朱穩字伯成婺源人文公十世孫題名碑作文公九代天順丁丑進士成化間任福建轉運使以廉幹稱改兩浙復除福建卒於官福建通志

增新

吳真歙縣人天順丁丑進士為茶陵縣丞楊榮倡亂以計擒戮歲饑發穀三萬石以賑全活甚眾湖廣通志

饒欽字克恭祁門人天順庚辰進士授戶部主事監收通州等處糧儲平料量時出納軍民稱便遷澁江知府地為夷獮雜處首興學校輕徭薄賦民俗丕變所屬路南州土官無子欲以女

襲職厚賂欽不受奏以職官易之及入覲士民攀轅泣留江南通志謝潤字德澤祁門人天順庚辰進士授刑部主事歷浙江僉事

處州禪寺僧千餘遇官商投宿殺而沈之池婦女削髮衣以伽服潤行部見大蛇俯伏而泣曰得非冤耶遣吏隨往蛇入池中

佯議修寺至檄郡縣收繫僧徒耳池水骸骨邱積遂焚其寺置僧於法婦女發遣還家有姊妹同孕姊屬收生婆以己女易妹

男訟莫決潤命取兒來先取活魚襁褓如兒狀佯怒而投之池姊不變色妹即號呼泣救遂以男歸妹凡所決疑獄類如此江南通志

舊通志

汪進字希顏婺源人天順甲申進士官刑部郎中出為湖廣僉事分巡衡永按施州土司之不法者民獲安堵升福建副使遷

羅數千人乘大艦假稱入貢迫境進察其奸率官軍逐之去遷貴州按察討平都勻叛苗歷陝西左布政使卒進性峭直不畏

權勢事親以孝聞撫孤姪曲盡恩意官三十餘年家無餘貲統

州志 汪杲字廷輝休甯人天順甲申進士授戶部主事董輸物料於



京師途次舟焚僚屬欲以私遺足數杲以為欺上章自劾遷曲

靖軍民府守羅雄士官相讐殺杲單騎馳諭即時解散江南通志

程熙字克和歙縣人以舉人知汀州府同知紫雲臺有盜數千

往來劫掠熙單騎抵其營諭散之福建通志

葉華字仲茂婺源人景泰初以明經入監疏奏先賢朱子有廟

無祀請照孟子事例於婺源闕里祠堂春秋致祭以元胡炳文

程復心配享命旨允行選保昌典史陳治安十策後復建言治

安五策升知縣卒於官江南舊通志

汪恕字秉忠祁門舉人官溫州府教授倡修學宮又買地一區

以拓學陞濬腰帶河闢九曲港建文昌祠未嘗假力於有司祀

溫州名宦徽州府志

汪溥字源學績溪舉人知蘄州州南有龍池河壅塞未能濬溥

到任河忽疏通邑有蝗災溥虔禱之俄有黑蟲齧蝗而滅秩滿

百姓詣闕保畱命再任以從民望升慶遠知府歷廣西兵備副

使卒於官萬姓統譜

胡敬字文恭歙縣人成化丙戌進士授行人擢御史清理江西

軍伍克振風裁巡按山西值歲祲檄郡邑賑濟全活數萬人遷

浙江僉事卒於官徽州府志

汪奎字文燦婺源人成化丙戌進士知秀水縣擢御史以星變

陳十事出為夔州通判討平雲陽劇賊量移敘州同知擢成都

知府歲饑多盜發廩賑救民皆復業遷廣西左布政以右副都

御史巡撫貴州致仕明史本傳

汪正字惟中歙縣人成化己丑進士知長樂縣鋤強植弱杜絕

私謁遷南戶部主事歷辰州知府當道咸薦其剛大有守卒於



官

萬姓統譜  
湖南通志

汪山字仁夫歙縣人成化壬辰進士授行人擢御史出按雲南孟密強夷曩罕弄與木邦宣慰乞法讐殺三十餘年屢撫不服山至諭以恩威皆革心効順南安諸洞恃險流劫調兵剿之踰月而定遷浙江僉事卒於官江南舊志

吳郁字文盛休甯人成化壬辰進士官郎中以廉能著出為雲南左參議寬猛適節民夷悅服徽州府志

洪漢字朝宗歙縣人成化壬辰進士官戶部郎中督儲湖南奏免逋課數萬升雲南參議提督銀場裁省中貴例供羨餘仍令礦官赴司交課著為令江南舊志

張清字一之婺源舉人知趙州奏定皇莊子粒額例減解馬七百餘匹民賴之升河間同知適法司中貴鞠壽甯侯獄力持正

議中貴中傷之帝曰秀才是遂免後中貴搢搆以罪詣宣州納

緩經河閒河閒民出迎曰為吾民受荼苦耶相泣而別徽州府志

汪琦字時用祁門舉人知德化縣請鈔廠羨錢雇夫役以甦民力及檄委兼理鈔廠凡收納船料痛革舊弊廉以處己惠以愛民至今懷之九江府志

葛興字應楨績溪人成化時判濟甯州惠民潔己魯王大書德政二字齋以旌之山東通志

方早歙縣人成化閒由舉人任臨安御吏方嚴聽訟明允尤重學校敬禮士夫創造竹林長橋二座以便往來浙江通志

汪道休甯人成化中知醴陵縣泣政嚴肅吏抱案牘至震懼不敢出聲積弊以洗境內晏然湖南通志

唐相字希愷歙縣人成化乙未進士擢御史闔殺人釋弗問相



抗論置之法出按廣西風裁峻厲以言事忤旨謫永城丞徽州府志

吳湜字一清歙縣人成化戊戌進士除工部主事奉使採修孝

陵殿材於蜀卻千金之餽升郎中卒於官貧無以斂僚友共贖

之徽州府志

汪貴字良貴歙縣人成化戊戌進士知嘉善縣愛民如子汰無

名之費凡數十萬錢朔望必造學講授為人簡默短於應對不

為當道所喜清覈田稅省小民賠納之弊以誣去官民數千人

攀號請畱其衣作畱衣亭邑人周宙等上書訟冤詔復職浙江通志

統譜萬姓

吳紳歙縣舉人成化間知都昌縣宅心平恕為政有方興利革

弊民皆向慕歷官至都轉運使江西通志新增

王珣字克溫祁門人成化戊戌進士選庶常改戶科給事中嘗

劾番僧論宮闈權貴見憚出查兩廣軍餉藩臬有不法者劾置

之法還朝疏時政六事執政忌之出為廣西參議乞休歸江南通志

汪舜民字從仁婺源人成化戊戌進士擢御史出按甘肅劾中

官將帥失事陳邊計章數十上以奏獄情辭不當貶蒙化衛經

歷擢江西僉事善讞獄剖決如流其清軍法後人遵守之改雲

南屯田副使麓川遺孽思祿渡金沙江據孟密承檄撫定之以

艱歸服除適淮陽大饑奉命賑濟用便宜發粟活饑民百二十

萬人流宄復業者八千戶晉福建按察使盜竊福清縣庫或誣

其怨家已成獄舜民廉得真盜脫三十人於死歲旱禱雨不應

躬歷獄釋狂繫輕罪檄所部有司皆清獄遂大沛歷河南左右

布政改涖南京都察院道卒明史汪奎傳

洪遠字克毅歙縣人成化戊戌進士歷知蒲田濬交河三縣皆



有聲擢御史數言事不避權貴升浙江僉事以劔豪強撫孤癯  
為先務正德中調湖廣副使會賑饑擇官分理獨委遠以全楚  
之半遷右副都御史巡撫雲南改南大理寺卿晉都御史諭諸  
言事者務存大體切時弊勿以詆訐為事轉南工部尚書即疏  
乞休會江西宸濠反調兵械備禦力疾視事以勞瘁卒遠官四  
十餘年勤慎如一日當劉瑾用事馳驅遠方無所附麗疾革子  
挺問以家事不答但曰爾輩以忠孝立身足矣一統志  
胡富字永年績溪人成化戊戌進士歷福建僉事闔福甯獄定  
遣囚二百餘人以艱去起補山東遷廣東副使四會猺亂剿擒  
五百餘人瀧水猺擾民富度猺所出沒處得荒田三千餘頃招  
獠人耕治之猺畏獠不敢出黎人寇儋州率兵討平之歷陝西  
左右布政使入為順天府尹進南大理卿遷戶部右侍郎坐大

理時勘事遲緩罷歸劉瑾誅起故官拜本部尚書以條上廣儲

積議格於權貴不行遂乞歸卒贈太子少保諡康惠明史本傳

方思潤字廷膏歙縣舉人知桂陽州振興學校調臨江通判盜

不敢犯嘗奪宸濠湖田還諸民及歸濠使人伺舟次殺之由聞

道得免江南通志

葉鼎字致和祁門舉人知黃梅縣有孀婦遭賦召之使傭織以

償農人鬻牛輸稅使立券以候秋成冤獄積年不決立剖之以

艱歸民涕泣越境而送之江南通志

胡汝慶字天錫績溪人以貢授長沙推官時賊擾長沙指揮韓

輔戰死汝慶設計與賊戰遂擒其首劉英等以功被旌徽州府志

胡愈字宗韓績溪舉人授歸德同知時河失故道泛溢甚愈白

當道別鍤新河以殺其勢掘地得窖錢悉以佐治河費升敘州



府通判徽州府志

謝瑩字廷獻祁門人成化辛丑進士由行人授御史巡視浙江奏免竈戶負課又奏私販肩擔背負者不坐民免流離遷雲南按察副使軍變單騎入營諭解後官陝西按察使謹邊防釋冤獄有僧妙正者恃秦王勢殺人吏不敢問執而治罪陝民德之肖像以祀升廣東布政卒於官陝西通志 祁門縣志

黃華字實夫歙縣人成化辛丑進士知平江縣修繕學校壇宇橋梁道路歷官兵部主事奉敕大閱兩京山東江浙諸地得材官騎士數萬參議福建討平漳汀流賊以劉瑾擅權歸湖南通志 江

孫怡字德容祁門人成化甲辰進士官刑部郎中理刑淮安請託不行時人爲之語曰一官清澈骨三尺法無私江南舊志

汪澐字源潔績溪人成化進士知玉山縣寬簡宜民清苦著節每食齋粥而已嘗公出刻期未回丞問饋以米力卻之尋擢南

臺御史江西通志 新增

汪鏜字汝和歙縣諸生官雷都司北城獲巨盜一時懾伏江無剽劫旋判楚雄攝郡事北勝馬敕二司劫殺數年受檄以單騎往兩言而事定請於督學以縫掖衣衣其嚮學者遂著爲令而

俗益化歙縣志

張敏字志學祁門人成化辛丑進士知桐柏縣民祠祀之擢御史劾張皇親蕭內侍怙寵肆橫時稱張鐵面升四川參議致仕江南通志

曹祥字應麟歙縣人成化甲辰進士授南戶部主事遷郎中出守寶慶府教民作水車以濟旱潦參政四川與平藍鄆劇盜歷



官右副都御史巡撫貴州阿則阿馬等煽亂會兵擒剿平之以

疾歸卒賜祭葬

湖南通志  
徽州府志

胡光字文光績溪人成化甲辰進士授廣州推官以劾中官出

鎮不法事謫白泥驛丞改知灌縣築江都堰除虎患升曲靖府

同知灌人祠祀之

一統志雲  
南名宦

潘珏字玉汝婺源人成化甲辰進士知蘄水縣城內有津人競

渡或致淹溺珏架梁以鐵捷之民不病涉北郭外置倉二十四

所又增修水次倉後知蘄州作阜民倉積粟至八萬餘石歲旱

發倉以賑多所全濟轉金華同知蘭谿民誣姪夜毆叔殺其妾

獄具珏閱成案見其初驗時不言妾何衣悟曰豈有婦人裸而

救鬪者一詰而服坐叔故殺而出姪罪

一統志湖北名  
宦  
浙江通志

胡暄字啟明歙縣諸生成化間官湖廣靖州綏甯主簿山川險

阻苗寇出沒郡邑莫敢聲討暄攝邑令請加征剿監司躡之即

委轉粟運輸兼統巡哨次崖小水關硤等堡生擒斬級立功凱

旋監司用其議奏請立縣名曰城步凡六次進擊皆有功績又

請以軍興餘糧賑貸貧民在邑勸農桑崇儒雅發奸摘伏鋤弊

興利民人戴之

歙縣志

汪嵩字季高婺源舉人知安吉縣歷撫州同知乞休歸舟至上

饒聞宸濠亂即回舟慷慨勤王亂定告歸王守仁畱之不得以

禮送還鄉

徽州府志

程寬字栗夫歙縣舉人知安化縣歲旱蝗捕滅甚力煮粥以賑

全活甚眾歷知光山孝感山陰皆有聲遷建甯府通判檄主海

口鹽政有大豪相構為亂寬畫方略討平之改漳州府同知

通志  
徽州府志



黃應坤字惟簡歙縣進士知浮梁縣清廉慈惠人不見其疾言  
遽色民無不達之情而吏畏其操介凜如神明宿弊為之盡清  
庭有餘閒獄無滯訟其請改置郵馳路尤為永遠便民未暮年  
以憂歸民攀留不得立祠祀之

江南通志  
新增

戴驪字致遠績溪舉人知建安縣除避繇詭籍撤佛寺為養濟  
院清官地為義冢治大豪練民兵築河隄興學校致仕歸惟圖  
書敝衣而已

徽州府志

江昌字伯大歙縣舉人知攸縣輕徭節費與民休息宿猾不敢  
市姦升南昌同知有當戍者挾中貴請免昌立遣之擢岳州知  
府

徽州府志

汪璿字舜璣黟縣人成化丁未進士知武岡州改陝州擢工部  
主事清理九江鎮江蘆洲有大豪侵貧民業悉追還之餽金求

免者卻之論如法復立條例以垂永久以疾歸

江南舊志

范順休甯人成化末知麻陽縣勸農興學務以理義化民創建

官舍有廢必舉

湖南通志

方汝榮字君實績溪監生成化間任福建安溪知縣清勤愛民  
尊嚴教士以事忤郡長吏中以法當道察其廉能得釋隨以憤

卒士民大恚

福建通志  
新增

唐弼字希說歙縣人成化丁未進士授戶部主事命監內帑中  
貴斂手避之歷四川僉事不法吏聞風解綬去以疾歸行無以  
為裝

成都府志

汪度字宏夫績溪舉人知上虞縣衣布茹澹人歌誦之民有犯  
必以理論未嘗輒加鞭扑民亦不忍欺舉賢良忤劉瑾歸士民  
樹碑頌德正德時饒賊猖獗倡率義勇保境邑賴以安上虞與



本邑皆祀之浙江通志徽州府志

汪明字廷瑞黟縣人以貢授新昌縣丞有巨盜劫掠鄉邑討平之升湖口知縣一日見羣鳥哀鳴於庭隨之數里外茂林中見數十巢卵未成雛訊之則明日伐是木也召其民止之又夜夢大池側有披髮訟冤者詰朝涸池果得屍為怨家所傷治抵罪

升歸德州知州徽州府志

程傳字佐時績溪舉人知新昌縣建學宮築義冢修養濟院民

庶為立去思碑徽州府志

孫榜姓忠顯字良輔歙縣人宏治癸丑進士授大理寺評事每

論囚覆奏徹夕不寐披閱再三乃上之奉命審錄江浙紹興饑民求賑所司坐以劫官糧罪忠顯訊出之全活甚眾升左寺正

徽州府志

戴敏字遜之婺源人宏治丙辰進士官辰州知府算賊猖獗敏緋衣小隊馳賊營呼曰太守來賊駭竄復呼曰太守來活汝非殺汝也賊羅拜遂降擢貴州左參政丁父艱御史以方征都勻上疏欲畱敏不可遂歸江南舊通志

吳遠字惟明歙縣人宏治丙辰進士知莆田縣歲祲多盜遠課農桑固封守賑困乏凡學舍橋梁郵館皆治之不累民盜皆化為良升黎平知府黎雜徭獯喜弄兵遠以禮讓教之彬彬向化

江南通志福建通志

胡潛字孔昭績溪人宏治間任福建德化知縣居官三年廉潔自持凡水利橋梁廨舍悉捐俸倡修訟者常勸化之使自省鞭扑不施囚繫不及老幼以艱解任福建通志新增

戴銑字寶之婺源人宏治丙辰進士選庶吉士改給事中數有



建白武宗即位請敕六科檢詳宏治間所行諸大政備錄進覽  
又言四方歲辦多非土產請蠲其所無既乃與李光翰等連章  
奏雷劉健謝遷且劾中官高鳳帝怒逮詔獄廷杖除名銑創甚  
遂卒世宗立贈光祿少卿明史本傳

王壽字希仁婺源人宏治丙辰進士官禮部郎中時冢宰為劉  
瑾之族嘗有所屬駁不行出守桂林乞養歸行李蕭然耕讀自  
給徽州府志

程材字良用歙縣人宏治丙辰進士授汀州府推官屬邑有訟  
悉詣材知府嫌之讒於巡按御史胡華會有囚華欲置之死材  
力爭華悟遂以循良薦擢御史清軍浙江道遇中官進鮮者暴  
橫不法疏劾之武宗立上正本十事劾內侍馬永成谷大用劉  
瑾竊弄威權瑾撫其細故罰米輸塞徙其家屬於海南瑾誅得

釋江南通志  
徽州府志

張芝字廷毓歙縣人宏治丙辰進士授大理評事督學廣西會  
猺獞反監軍討之猺匿深穴中以計盡其矢石舉種就俘擢荆  
南副使命下而卒江南通志

汪亨歙縣人知桂陽縣潔己愛民邑軍驕悍歐死平民立寘之  
法軍始戢卒於官葬桂陽桂枝嶺湖南通志

汪瑛歙縣人知藍山縣政尚寬平歲荒設法賑饑民免離散湖南通志

程瑄字德和歙縣人宏治丙辰進士除戶部主事摘發隱沒官  
緡四千椎北新關稅清理屯田皆以廉稱遷泉州知府擢兩浙  
鹽運使江南通志

吳漳字清甫歙縣人宏治己未進士知胙城縣出見沙霾中有



兒捧頭跪訴夜夢有言宋山之名者得其人一訊而服置之法

擢御史以劾劉瑾削籍瑾誅起官巡按北畿升山東副使河決

黃陵岡殫力鳩工齋沐告天水乃南徙復故道擢都御史江南通志

方謙字純吉祁門人宏治己未進士知鄞縣劉瑾女姪殺人吏

不敢捕謙叱令立致庭下論如律瑾以他事中之逮繫詔獄瑾

誅起工部主事出督蕪湖關口水迅風利不易泊而邏者誣

其走關商苦之謙為區別措置至今賴之江南舊通志

章瑞字廷召績溪人宏治己未進士授行人擢御史劉瑾竊柄

瑞上五事甚剴切謫江南布政司都事起知思恩府八寨賊時

出剽掠都司甘霖不敢討乃欲屠十三村以邀賞瑞責之曰汝

坐視八寨不問乃貪功欲殺平民吾必劾汝霖懼而止江南通志

唐澤字沛之歙縣人宏治己未進士知平鄉縣邑多水患築隄

一百八十里遷刑部主事時治獄者多阿劉瑾意殺人澤持法

獨平出補福建副使平海寇斬首七千餘級累升都御史巡撫

甘肅土魯番據哈密城為患眾數千病泄多死澤計羸寇不足

殲使醫治之有閒命之曰若病今起矣詰朝以戎服見寇皆頓

顙泣謝歸上表誓不復反悉還侵地升戶部右侍郎卒於涼州

贈左侍郎諡襄敏江南通志

汪標字立之祁門人宏治己未進士知武定州捐市稅民大悅

升刑部郎中出知鶴慶府政通民和調大理民遮擁不得行立

祠樹碑升金齒兵備致仕子溱字蛟潭正德丁丑進士授大名

府推官帝幸大名溱因事進諫陳軍民疾苦從駕官取驛馬去

溱追回帝曰汪溱邊督才也劉瑾聞之曰溱一見我邊督可立

得溱不答瑾誅升湖廣兵備平甯夏之亂擢江西左參政致仕



重刊安南通志卷之三  
歸江南通志  
徽州府志

汪彬字學之祁門人宏治壬戌進士授工部主事督臨清甄廠例有耗羨彬不受復督通州倉同官王浚失火焚庾法當逮彬自署任咎坐繫得釋歷知南甯府徽州府志

潘珍字玉卿婺源人宏治壬戌進士知諸暨縣創建預備倉新學宮拓養濟院民不知勞歷升山東僉事分巡兗州賊劉七等猝至有備不敢攻轉掠曲阜珍奏徙縣治而城之遷福建副使湖廣左布政使以右副都御史巡撫遼東入爲兵部左侍郎時議請討安南珍上疏諫帝責珍撓成命褫職歸尋詔復官致仕卒贈右都御史明史本傳  
浙江通志

程文字煥章婺源人宏治乙丑進士歷大理寺正獄無冤滯擢按察僉事備兵廣南猺獞不敢內犯與當道籌邊事不合罷歸

江南通志

潘旦字希周珍之族子宏治乙丑進士歷知漳州邵武二府在漳州時郡多海盜旦廉得土豪陰爲盜主者悉置之法三遷浙江左布政使斥羨金不取擢右副都御史撫治鄖陽數平巨寇累遷南刑部右侍郎旋以兵部左侍郎提督兩廣軍務詔起復毛伯溫討安南適安南使至求貢上疏請畱師觀變時族父珍適以言安南事得罪尚書嚴嵩張瓚絀旦議不用改南兵部未行引疾乞休卒贈工部尚書明史潘珍傳  
福建通志  
浙江通志

葉天爵婺源進士宏治間知崇仁縣剛明勤慎摘伏如神崇尚鄉賢興復水利又新寶唐書院士民思之江西通志  
新增

李汎字彥夫祁門人宏治乙丑進士授工部主事歷郎中出知思恩府猺獞變作單騎宣諭就撫者三萬餘人邊境悉甯會有



忌其功者引疾歸 江南通志

閻睿字汝思祁門人宏治中官浙江按察副使奏敕巡視海道

倭寇時入劫掠睿至水操艦戰咸斂跡不敢犯海道肅清 浙江通志

葉藹字德敷祁門舉人歷官慶遠知府田州岑猛謀逆藹征剿

多所贊畫猛授首餘黨未平單騎往諭之以功晉秩參政自撰

征苗錄記其事 江南舊通志



